

2 MANGA DATO

2 MANGA DATO 1

Si Iliyas ago so Dato Ahasiyas

Sii ko kiyapatay i Ahab na somiyopak a inged a Mowab sa Israil.

2 Miyakaisa a gawii na miyaolog so dato Ahasiyas poon ko liyoliyowan ko rowang iyan ko kaporoan o torogan iyan roo sa Samariya na kiyapalian den. Sabap roo na somiyogo sekaniyan sa manga mama a tig iyan kiran a "Ikano roo na isei niyo so Baal Sibob a aya tohan sa Ikron kaan aken katokawi o pekabager ako sangkai a pali."

3 Ogaid na so malaikat o Allah na pitero iyan ki Iliyas a taga Tisbi a "Lalakaw ka na go ngka balaka so manga sogo o dato sa Samariya na iseen ka kiran a 'Ino kano song ko Baal Sibob a tohan sa Ikron sa kapagado niyo ron? Ba da a Tohan sa Israil?'

4 Kagiya ka maoto na giyai i pitero o Allah: Di ka den keakar ko katri a iigaan ka. Mataan a petay ka! " Na pinggolaola i Iliyas so inisogo on o malaikat.

5 Kagiya komasoy so manga sogo ko dato na iniise iyan kiran a "Ino kano kesoy?"

6 "Aden a miyakitoona rekami a mama," a inisembag iran. "Na pitero iyan rekami a 'Kasoy kano ko dato a somiyogo rekano na teroa niyo ron a Giyai i pitero o Allah: Ino ka sogo sa manga mama sa kapagado iran ko Baal Sibob a tohan sa Ikron? Ba da a Tohan sa Israil? Sabap sa pinggolaola ngka ini na di ka den keakar ko katri a iigaan ka ka mataan a petay ka! "

7 Na iniise kiran o dato a "Antonaa i paras o mama a miyakitoona rekano a pitero iyan ai?"

8 Inisembag iran a "Ndiditar sekaniyan sa bombol a ayam na sesambitan sa kobal." "Giyoto si Iliyas a taga Tisbi!" a tig o dato.

9 Mandiyadi na somiyogo so dato ki Iliyas sa isa a kapitan a oonotan o lima polo kataw a manga sondaro niyan. Miyaoma iran si Iliyas a moontod ko poro a bobongan, na tiyakedegan o kapitan a tig iyan on a "Hey nabi o Tohan, inisogo o dato a tondagay ka!"

10 Inisembag on i Iliyas a "O sogo ako o Tohan na makatana so apoy a poon sa langit a lenganen kano niyan a rakes o lima polo kataw a manga taw ngka!" Na sarta den a miyakatana so apoy a poon sa langit na iniped iyan so kapitan ago so manga sondaro niyan.

11 Na somiyogo peman so dato ki Iliyas sa salakaw a kapitan a rakes o lima polo kataw a manga sondaro niyan. Na pitero o kapitan a "Hey nabi o Tohan, pitero o dato a tondagay ka nggagaan!"

12 "O sogo ako o Tohan," a tig i Iliyas, "na makatana so apoy a poon sa langit a lenganen

kano niyan a rakes o lima polo kataw a manga taw ngka!" Na sarta den a minitana so apoy o Tohan a poon sa langit na iniped iyan so kapitan ago so manga sondaro niyan.

13 Na somiyogo peman so dato sa ikatelo a kapitan a rakes o lima polo kataw a manga sondaro niyan. Tiyakedegan angkai a ikatelo a kapitan si Iliyas na somiyodiyod ko hadapan iyan a miyangangampedian on a tig iyan a "Hey nabi o Tohan, kapediin ako ngka ago so lima polo kataw a manga sondaro aken na pagongowi ngka so manga niyawa ami a manga oripen ka!"

14 Ilaya ngka man ka so paganay ago so ikadowa a kapitan a rakes o langon a manga taw iran na iniped o apoy a miyakapoon sa langit. Ogaid na imanto na pagongowi ngka so niyawa ko!"

15 Na pitero o malaikat o Allah ki Iliyas a "Tondagay ka den a ped iyan. Di ngka sekaniyan keleken." Na miyonot on si Iliyas na somiyong ko dato.

16 Pitero i Iliyas ko dato a "Giyai i pitero o Allah: Ino ka sogo sa pemakaado ko Baal Sibob a tohan sa Ikron? Ba da a Tohan sa Israil? Sabap sa miyanggolaola ngka ini na di ka den keakar ko katri a iigaan ka. Mataan a petay ka!"

17 Na miyatay si Ahasiyas a aya kiyatoman o pitero o Allah a miyakanggolalan ki Iliyas. Sabap sa da a wata iyan a mama na si Yoram na aya on miyakasambi a dato sii ko ikadowa ragon ko kiyandato i Yahoram a wata i Yahosapat a dato sa Yodah.

18 So ped a miyanga sosowasowa ko kandadato i Ahasiyas ago so manga pinggolaola niyan na palaya den misosorat ko 'Ribro a Totolan ko manga Dato sa Israil.'

2 MANGA DATO 2

Minibayaw si Iliyas sa Kasorgaan

Miyaoma so gawii a kimbayaon o Allah ki Iliyas sa kasorgaan a pegawidawidan o mabager a ndo. Pelalakaw si Iliyas ago si Ilisas a poon sa Gilgal

2 Na pitero i Iliyas ki Ilisas a "Sii ka den, ka siyogo ako o Allah sa Bitil."

Ogaid na tig i Ilisas a "Mataan ko kaooyagoyag o Allah ago kaooyagoyag ka ka di ko seka den ngganatan." Na tomiyaros siran sa Bitil.

3 So sagorompong a manga nabi sii sa Bitil na somiyong ki Ilisas na iniise iran on a "Katawan ka a so Allah na mbelagen iyan reka imanto so kadnan ka?"

"Oway, katawan ko," a inisembag i Ilisas, "ogaid na di niyo dii teroa."

4 Na pitero i Iliyas ki Ilisas a "Sii ka den ka siyogo ako o Allah sa Yariko."

Ogaid na inisembag i Ilisas a "Mataan ko kaooyagoyag o Allah ago so kaooyagoyag ka ka di ko seka den ngganatan." Na tomiyaros siran sa Yariko.

5 So sagorompong a manga nabi sa Yariko na somiyong ki Ilisas na iniise iran on a "Katawan ka a mbelagen reka o Allah imanto so kadnan ka?"

"Oway, katawan ko," a tig i Ilisas, "ogaid na di niyo dii teroa."

6 Na pitero i Iliyas ki Ilisas a "Sii ka den ka siyogo ako o Allah sa Lawasaig a Yordan."

Na tig i Iliyas a "Mataan ko kaooyagoyag o Allah ago so kaooyagoyag ka ka di ko seka den ngganatan." Na tomiyaros siran den lomalakaw.

7 So lima polo kataw ko sagorompong a manga nabi na miyamanondog kiran na miyamanindog a maawat ki Iliyas ago si Ilisas ko kiyatareg iran ko kilid a Yordan.

8 Inendaan i Iliyas so gerab iyan na liyolon iyan na inibadas iyan ko ig. Na miyabagi so ig sa kawatan ago sa diwang na rominipag siran on a dow a ko mamara a lopa.

9 Kagiya makaripag siran na tig i Iliyas ki Ilisas a "Teroa ngka raken i kiyogop aken reka sa di aken reka pen kakebelag?"

"Pngnin ko a kabegan ako sa dow a takep ko gees ka," a inisembag i Ilisas.

10 "Maregen a betad so piyangni ngka," a tig i Iliyas, "ogaid na o mailay ako ngka ko kakebelag aken reka na rek ka anan. Na o di, na da."

11 Sii ko kapelalakaw iran a di siran dii mbityarai na tekaw den a miyakabayan a karo a pekedeg sii ko pageletan iran a petoyoken o manga koda a pekedeg na minibayaw si Iliyas sa langit a piyagawidawidan o mabager a ndo.

12 Miyailay ini i Iliyas na inipelalis iyan a "Ama aken! Ama aken! So karo o Israil ago so manga koda on!" Na miyada a kapekeilaya niyan ki Iliyas, na kinisi iyan so gerab iyan na miyabagi.

13 Piyorot iyan so gerab a miyaolog a poon ki Iliyas na komiyasoy a tominindog ko kilid a lawasaig a Yordan.

14 Na inibadas iyan so gerab i Iliyas ko ig a inilalis iyan a "Anda so Allah a Tohan i Iliyas?" So kinibadasen iyan on ko ig na miyabagi sa kawatan ago sa diwang na rominipag sekaniyan on.

15 So kiyailaya rekaniyan o sagorompong a manga nabi a poon sa Yariko na pitero iran a "So gees i Iliyas na minitemo ki Ilisas!" na somiyong siran on a magalaw ron na miyamanodiyod ko hadapan iyan.

16 "Ilaya ngka man," a tig iran, "ka aden a lima polo rekami a manga babager a mama. Pakalalakawa ngka siran na pakimbanogen ka kiran so kadnan ka. Ka masiken a inibayaw sekaniyan o Roh o Allah na inibetad iyan ko isa a palaw o di na sii ko isa a balintad."

"Di," a tig i Ilisas, "di ngka siran sogoa."

17 Ogaid na tigel iran sekaniyan taman sa miyaya o ba da miyog. Na tig iyan a "Sogoa ngka siran." Na piyakalalakaw iran so lima polo a manga mama a mimbabanog ko miyakatelo gawii ogaid na da iran den matoon.

18 Kagiya komasoy siran ki Ilisas na pitero iyan kiran a "Ba aken rekano da teroa a di kano pelalakaw?"

So Kiyabolongi ko Ig

19 So manga mama ko siti na pitero iran ki Ilisas a "Ilaya ngka man ka giyangkai a siti na

mapiya a kapakambebetad iyan a pekeilay ngka. Ogaid na marata so ig on na di pagodaren so lopa."

20 "Witi ako niyo sa bago a ladiya," a tig i Ilisas, "na tagoi niyo sa timos." Na inowit iran on.

21 Lominiyo sekaniyan ko bowalan a pekepoonan o ig na iniitog iyan on so timos a tig iyan a "Giyai i pitero o Allah: Biyolongan aken angkai a ig. Di den paman kasabapan ko kapatay o di na so di kapagodara ko lopa."

22 Na lalayon den mapiya angkoto a ig taman imanto a giyoto so pitero i Ilisas.

Piyagongatongat si Ilisas

23 Giyanatan i Ilisas a Yariko na somiyong sa Bitil. Sii ko kapelaakaw niyan ko lalan na aden a mililiyo ko inged a manga bago a mama a piyagongatongat iran sekaniyan a di iran dii teroon a "Hey opaw, awa ka sii! Opaw, awa ka sii!"

24 Diningilan iyan siran a tintengan iyan na inisinta iyan siran sii ko Ingaran o Allah. Na sarta den a dow a barawang a lominiyo ko kalasan na piyangeros iran so pat polo ago dow ko manga bago a mama.

25 Na tomiyaros si Ilisas ko Palaw a Karmil na ipoon roo na komiyasoy sa Samariya.

2 MANGA DATO 3

Somiyopak a Mowab

Sii ko ikasapolo ago walo ragon ko kandadato i Yahosapat a dato sa Yodah na si Yoram a wata i Ahab i miyadato sa Israil sii sa Samariya na miyakasapolo ago dow ragon a kiyandato iyan.

2 Miyakanggolaola sekaniyan sa marata ko kapekeilaya on o Allah ogaid na kena o ba lagid o kamarataan a pinggolaola i ama iyan ago si iyan a Disibil. Giba iyan so barahala a Baal a pimbaalan i ama iyan.

3 Apiya pen oto na pesogoken iyan so manga dosa i Yarobowam a wata i Nibat a piyakisogok iyan pen ko manga Israil, na da niyan ai talikodi.

4 Samaoto na si Misa a dato sa Mowab na pepangoyag sa manga bilibili, na oman ragon na pembayad sa bowis ko dato sa Israil a magatos nggibo a manga bilibili a rakes o bombol o magatos nggibo a manga mama a bilibili.

5 Ogaid na sii ko kiyapatay i Ahab na somiyopak si Misa ko dato sa Israil.

6 Sabap roo na gomiyanat so dato Yoram a poon sa Samariya na tinimo iyan so langon a manga sondaro sa Israil.

7 Na piyakiwit iyan pen angkai a katero ki Yahosapat a dato sa Yodah: "Somiyopak raken so dato sa Mowab. Ba ako ngka pagonoti sa kipetidawaan tano ron?"

"Magonot ako reka," a inisembag iyan. "Makatitiyagar ako den a lagid ka ago so mambo so manga pagtaw aken ago manga koda.

8 Anda tano pagokit sa kanggobat tano?"

"Sii tano magokit ko disirto sa Idom," a inisembag i Yoram.

9 Mandiyadi na lomiyalakaw so dato Yoram a oonotan o dato sa Yodah ago so dato sa

Idomiya. Kagiya maipos so pito gawii a pepekaalibit a kiyalalakaw iran na miyalengan so ig iran na da den a ba keinom o manga sondaro o di na so manga ayam a pakaoonoten iran.

10 "Aidaw, antonaa i sowaan tano?" a tig o dato sa Israil. "Ba aya initimo rektano o Allah a telo a dato na giya bo a kapelada niyan rektano ko kapaar a Mowab?"

11 Ogaid na iniise i Yahosapat a "Ba da a nabi o Allah sii a nggolalan on so kakeisei tano ko Allah?"

Inisembag o isa ko sanasanaan o dato sa Israil a "Sisii si Ilisas a wata i Siyapat a salinggogopa gowani i Iliyas."

12 Tig i Yahosapat a "Mataan a tero so Allah a nggolalan rekaniyan!" Na somiyong on so telo a manga dato.

13 Na pitero i Ilisas ko dato sa Israil a "Ino aken seka keogopi? Song ka ko manga nabi o ama a ka ago so ina a ka."

"Di," a inisembag o dato Yoram, "ka so den so Allah i tominimo rekami a telo a dato sa kapelada niyan rekami ko kapaar a Mowab."

14 Na tig i Ilisas a "Mataan ko kaooyagoyag o Allah a Lebi a Mamaapaar a pepangongonotanan ko, ka o di aken pagaadatan si Yahosapat a dato sa Yodah na di ko sekano den pagilain o di na tegoon sa ginawa.

15 Ogaid na witi ako ngka imanto sa pangongotiyapi."

Na so di niyan dii kapangotiyapi na minitemo ki Ilisas so gees o Allah

16 Na pitero iyan a "Giyai so kabasa o Allah: 'Penoa niyo a manga kakar angkai a balintad,'

17 Ka pitero o Allah a 'Da den a ba niyo keilay a ndo aya pen o ba oran na bapiya pen oto na kepeno a ig angkai a balintad, na sekano ago so manga pangangayamen iyo ago so ped a manga ayam iyo na pekainom.'

18 Ogaid na malebod ai a mapenggolaola o Allah ka peladen iyan rekano pen a Mowab.

19 Tebanen iyo so oman i kokotaan a siti ago oman i mala a inged. Kepata iyo so oman i mapiya a kayo, keolen iyo langon so manga paridi na kebinasa niyo a manga ator so oman i dii mbabasokan."

20 Sii ko talondog a kapipita ko oras a kapesepaat sa soasoat na aden a ig a petoga roo a makapopoon sa Idom! Na miyapeno a ig so kalopaan.

21 Kagiya maneg o manga Mowabiyo a miyakatalingoma so manga dato a nggobat kiran na piyakitawag iran so oman i mama a matoa mangoda a pekakepit sa gomaan na piyakakaden iran siran ko temanaan a Mowab.

22 Sii ko kiyapagnaw iran ko teked a kapipita na pesaleg so alongan ko ig roo ko sabala a balintad, na mariga a kapekeilaya on o manga Mowabiyo a lagid o rogo.

23 "Rogo oto!" a tig iran. "Mitidawa angkoto a manga dato na biyono o oman i isa so ped iyan. Itano roo ka tebanan tano so kampo iran!"

24 Ogaid na so kiyapakaoma iran ko kampo na mimbawat so manga Israil na miyakitidawa kiran taman sa miyapakapalagoy iran siran, na peketeden iran so manga Mowabiyo a pepamonoon iran sii ko inged iran.

25 Piyaminasa iran so manga siti iran, na so oman i mama na lomibad sa ator ko oman i dii mbabasokan taman sa kiyasapengan. Piyangolen iran langon so manga paridi na piyata iran so oman i mapiya a kayo. Sa kaposan na giya bo a Kir Harasit i miyalamba, ogaid na linikopan ai o pepamanalibat na giyobat iran pen.

26 Kagiya mailay o dato sa Mowab a petebanen sekaniyan na piyakaonot iyan so pito gatos a sondaro niyan a kipepedang na tipengan iran lomeseb so manga sondaro o dato sa Idomiya kaan makapalagoy ogaid na da iran magaga.

27 Sabap roo na kinowa niyan so kaka a wata iyan a mama a aya on pekasambi a dato na inisoasoat iyan a petotongen sii ko kota o siti. Sabap roo na tanto a kiyalekan so manga Israil na mipeto siran a miyamangasoy ko inged iran.

2 MANGA DATO 4

So Lana o Balo

Miyakaisa a gawii na so balo o mama a ped ko sagorompong a manga nabi na somiyong ki Ilisas a tig iyan on a "So oripen ka a karoma ko na miyatay, na katawan ka a inikalek iyan so Allah. Ogaid na miyakaoma so miyagotang on ka kowaan iyan so dowakataw a wata aken a manga mama a pengongoripenen iyan."

2 "Andamanaya i kakeogopi aken reka?" a iniise on i Ilisas. "Teroa ngka raken o antonaa i sisii ko walay ngka?"

"Da den a ba aken san rek," a tig o babay, "a liyo ko maito a lana."

3 Tig i Ilisas a "Pamanipanik ka ko manga siringan ka na pamangni ka kiran langon sa manga omoy a da a tago iyan. O ba ka pangni sa matag maito.

4 Na soled kano ago so manga wata a ka ko walay na lekebi ngka so pintoan. Ododa ngka so lana ko langon o manga omoy na igira a miyapeno so isa on na pesilin ka."

5 Na giyanatan iyan si Ilisas na ininggolalan iyan so pitero iyan. Piyangowit on o manga wata iyan so manga omoy na pepangododan iyan sa lana.

6 Kagiya mapeno langon so manga omoy na pitero iyan ko wata iyan a "Witi ako ngka pen sa ped."

Ogaid na tig iyan on a "Da den a miyalamba a omoy." Na gominek tomoga so lana.

7 Somiyong sekaniyan ko nabi Ilisas na piyanotol iyan on ai. Na tig iyan a "Ika roo na pesaa ngka so lana na bayadi ngka so otang ka, na mipegoyag iyo ago so manga wata a ka so miyalamba a pirak."

Si Ilisas ago so Babay sa Sonim

8 Miyakaisa alongan na somiyong si Ilisas sa Sonim. Aden a tatamoken a babay a

mababaling roo a miyoyo rekaniyan maot a ken. Ipoon den sangkoto a gawii na igira a pesegad roo si Ilisas na pegaot roo koman.

9 Na pitero o babay ko karoma niyan a "Katawan ko a giyangkai a mama a lalayan sii pegaot na soti a nabi o Tohan.

10 Mbaal ta sa maito a rowang ko paga na tagoan ta sa katri, lamisaan, korsi ago palitaan para rekaniyan kaan on makatareg sekaniyan igira a pepekatalingoma rekta."

11 Miyakaisa alongan ko kiyapakaoma roo i Iliyas na miyanik ko rowang iyan sa poro na miniga on.

12 Pitero iyan ki Gihasi a talasogoay niyan a "Tawaga ngka so babay." Na tiyawag iyan na miyangadap on.

13 Na tig i Ilisas ki Gihasi a "Iseen ka on a 'Antonaa i kibalas ami reka sabap ko langon a mapiya a pinggolaola ngka rekami a kiyamaregenan ka? Ba kami ndolon ko dato para reka, o di na sii ko komandir o manga sondaro?" "

Inisembag o babay a "Rek aken so langon taman a kailangan aken sii ko manga taw aken."

14 "Antonaa den i kibalas ta on?" a iniise i Ilisas ki Gihasi.

Tig i Gihasi a "Da a wata iyan a mama na miyalokes den so karoma niyan."

15 "Na, tawaga ngka peroman," a tig i Ilisas. Na kagiya komasoy na tominideg so babay ko pintoan

16 Na pitero on i Ilisas a "Lagid ai a masa ko telondog a ragon na pekasakopo ka sa wata a ka a mama."

"Di, kadnan ko," a tig iyan, di ngka pemokegi so oripen ka, hey nabi o Tohan!"

17 Ogaid na miyaogat so babay na sii ko tomiyalondog a ragon a lagid den oto a masa na mimbawata sa mama a giyoto den so miyatero on i Ilisas.

18 Miyakala so wata na miyakaisa alongan na lominiyo sekaniyan ki ama iyan a sisii ko dii meraragon.

19 Na minitekaw den a minigoraok iyan a "Masakit a olo aken! Masakit a olo aken!"

"Awidi ngka ki ina iyan!" a tig o ama iyan ko isa a talasogoay.

20 Kagiya kaawidan iyan on so wata na aabenen i ina iyan taman ko kaoto a alongan na miyatay.

21 Na inawidan iyan sa poro na piyakaiga iyan ko katri o nabi o Tohan na likeban iyan so pintoan a lominiyo.

22 Piyakitawag iyan so karoma niyan na pitero iyan on a "Pakaonota ngka raken so isa ko manga talasogoay ago kimar kaan ako makanggagaan somong ko nabi o Tohan ago makakasoy."

23 "Ino ka on song imanto," a iniise iyan on. "Kena a ba saribolan imanto o di na gawii a idedeke."

"Na den," a tig o babay.

24 Siniyaan iyan so kimar na pitero iyan ko talasogoay niyan a "Pengonaan ka na di ka pekalambat taman sa di ko reka teroon."

25 Na gomiyonat sekaniyan a somiyong ko nabi o Tohan roo sa Palaw a Karmil.

25 So kiyailaya on i Ilisas ko mawatan pen na tig iyan ki Gihasi a "Ilaya ngka man, kaoto so babay a taga Sonim!"

26 Palalagowi ngka na go ngka alawa na iseen ka on a 'Mapipiya ka? Mapipiya so karoma ngka? Mapipiya so wata a ka?' "

"Palaya den mapipiya," a tig o babay.

27 So kinisampay niyan ko nabi o Tohan na siyodiyodan iyan ago kiyapetan iyan so ai niyan. Inobay i Gihasi ka itolod iyan, ogaid na tig i Ilisas a "Di ngka petekora ka tanto a mararata a ginawa niyan na pepagemaan raken o Allah; da niyan raken teroa o ino to."

28 "Ba ako reka miyangni sa wata a mama, kadnan ko?" a tig o babay. "Ba ko reka da matero a di ngka teralon so panginam aken?"

29 Na pitero i Ilisas ki Gihasi a "Tiyagar ka den ko kapelalakaw! Awidi ngka so teken aken na palalagoy ka! O aden a kebalak ka na di ngka selama, na o aden a selam reka na di ngka den sembaga. Sekoon ka so teken aken ko paras o wata."

30 Ogaid na tig o ina o wata a "Matamataan ko kaoyagoyag o Allah ago so kaoyagoyag ka ka di ko seka den ngganatan." Na giyoto a mimbangon si Ilisas na miyonot ko babay.

31 Miyona kiran si Gihasi na iniseko iyan so teken ko paras o wata ogaid na da den a ba on karina ko kaoyagoyag. Mandiyadi na komiyasoy si Gihasi a makipetoona ki Ilisas na pitero iyan on a "Da den makanaw so wata."

32-33 Kagiya misampay si Ilisas ko walay na somiyoled ko rowang a sekaniyan bo na miyailay niyan so wata a makaiiga a maatay sii ko katri niyan. Na likeban iyan so pintoan na miyangangarapan ko Allah.

34 Somiyong sekaniyan ko katri na gipean iyan so wata a makapepantag so ngari iran, so manga mata iran ago so manga barokan iran. Na sii ko kagegepei niyan on na miyakayaw so lawas o wata.

35 Mimbangon si Ilisas na milakalakad a dii kesakasoy ko rowang na komiyasoy ko katri na gipean iyan peman so wata. Miyakambaan so wata sa miyakapito na bikar iyan a mata niyan.

36 Tiyawag i Ilisas si Gihasi na pitero iyan on a "Talowi ngka so ina o wata" na pinggolaola niyan. Kagiya makaoma so babay na tig i Ilisas a "Kowaa ngka so wata a ka."

37 Na somiyodiyod so babay sii ko ai niyan, na kinowa niyan so wata iyan na lominiyo.

So Pakatowa sii ko Koden

38 Komiyasoy si Ilisas sa Gilgal na tataonen angkoto a inged sa masa oto. Miyakaisa a gawii a malilimod so sagorompong a manga nabi a ped i Iliyas na pitero iyan ko talasogoay niyan a "Datolen ka so mala a koden na tindai ngka sa biyobog a makan angkai a manga mama."

39 So isa kiran na lominiyo ko pangomaan a penimo sa manga leletaan. Miyakatoon sa matag baden pepamangto a waged na kominowa sekaniyan ko onga niyan a manga pangi sa taman sa miyakena niyan. Kagiya komasoy na piyangerad iyan na tiyago iyan ko biyobog a ititinda ko koden apiya pen di iran katawan o antonaa den oto.

40 Piyanangel so biyobog a ken o manga mama ogaid na so den so kiyataami ran on na minigoraok iran a "Hey nabi o Tohan, aden a pekapatay sii ko koden!" Na di siran on pekakan.

41 Tig i Ilisas a "Kowa kano sa arina." Tiyago iyan ai ko koden na tig iyan a "Pangenata niyo ko manga mama a makan iran." Na da den a ba pekabinasa ko koden!

So Kiyapakakana ko Magatos a Taw

42 Miyakaisa peman a gawii na miyakaoma a mama a poon sa Baal Siyalisa a inowitan iyan so nabi o Tohan sa sako a gopen piragon a manga onga a pereperan iyan ago dow a polo timan a paan a pasad ko paganay a iniyonga o bantad iyan. Na tig i Ilisas ko talasogoay niyan a "Began ka ko manga mama a makan iran."

43 "Andamanaya i kapekatokida ko sii ko magatos a taw?" a iniise iyan.

Na pitero peman i Ilisas a "Began ka ko manga mama a makan iran ka giyai i pitero o Allah: Pekakan siran a aden pen a kesama on."

44 Na piyakatokid iyan kiran na komiyan siran a aden pen a miyasama on a aya kiyatoman o miyatero o Allah.

2 MANGA DATO 5

So Kiyabolongi ko Bowa i Naaman

Samaoto na si Naaman a so komandir o manga sondaro o dato sa Siriya na mala ago pageedatan a mama ko kapekeilaya on o kadnan iyan sabap sa nggolalan rekaniyan na bigan o Allah a Siriya sa kiyapakataban. Mawaraw sekaniyan a sondaro ogaid na aden a bowa niyan.

2 Sii ko isa a kiyasondoli o manga Isiriyenen sa Israil na miyakabiyag siran sa raga, na pepanalagad sekaniyan ko karoma i Naaman.

3 Miyakaisa alongan na pitero o raga ko bai niyan a "O ba bo makasong so kadnan aken ko nabi a sisii sa Samariya! Kebolongan iyan on so bowa niyan."

4 Na somiyong si Naaman ko dato sa Siriya na piyanotol iyan on so pitero o raga a poon sa Israil.

5 "Ika roo den," a tig o dato, "song ka den ko dato sa Israil ka pekawit ako ron sa sorat a keawidan ka."

Mandiyadi na gomiyanat si Naaman a maawid sa telo gatos ago pat polo ka kilo a pirak, pito polo ka kilo a bolawan ago sapolo ka sokoba a nditaren.

6 Aya oni o sorat a inowit iyan ko dato sa Israil na "Giyangkai a sorat na aya ngka kikilala ko oripen aken a si Naaman a siyogo aken reka kaan ka kabolongi so bowa niyan."

7 So den so kiyabatiyaa on o dato sa Israil na kinisi iyan so kimon iyan a tig iyan a " Ino ako pekawiti o dato sa Siriya sa mama a pekibolongan iyan raken so bowa niyan? Ba ako Tohan a ba pekapatay ago pekaoyag? Ilaya niyo man ka penabasabap sekaniyan sa kapakambono ami!"

8 Kagiya maneg i Ilisas a kinisi o dato so kimon iyan na piyakitero iyan on "Ino ngka kisia so kimon ka? Pakasonga ngka raken angkoto a mama kaan iyan katokawi a aden a nabi sii sa Israil."

9 Mandiyadi na somiyong roo si Naaman a rakes o koda iyan ago karo na tomiyareg ko pintoan o walay i Iliyas.

10 Na piyakiliyowan i Ilisas sa sogo a tig iyan ki Naaman a "Ika roo den na go ngka onabi a ginawa ngka sa makapito sii ko lawasaig a Yordan ka mapekaasal so sapo o ka na kelompiyowan ka."

11 Ogaid na miyawa roo si Naaman a pekerarangitan a ipenarotaro iyan a "Aya katao ko ron na ba mataan a peliyowan ako niyan a tindeg ago petelo ko Ingaran o Allah a Tohan iyan a ipemayapay niyan a lima niyan ko liyawaw o bowa na mbolongan ako niyan.

12 Ba di giya Abana ago giya Parpar a manga lawasaig sa Damasko i lebi a mapiya a di so apiya antonaa a lawasaig sa Israil? Ba ako ron di makapengonab ago kelompiyowan?" Na mipeto si Naaman na miyawa roo a pekerarangitan.

13 Ogaid na miyobay rekaniyan so manga oripen iyan a tig iran a "Ama ami, o iniinsarat reka o nabi a nggolaola ka sa mala a nganin na ba ngka di penggolaolaa? Na ay taralebi pen o teroa niyan reka a ba ka den pangonab na kelompiyowan ka?"

14 Na giyoto a tomiyondagay sekaniyan sa Yordan na inisineb iyan on a ginawa niyan sa miyakapito a so den so pitero on o nabi o Tohan, na miyakaasal so sapo iyan a lagid o sapo o bago a mama na miyapakapiya sekaniyan den.

15 Mandiyadi na komiyasoy si Naaman ko nabi o Tohan a rakes on so langon a manga taw niyan. Miyangadap siran on na tig i Naaman a "Imanto na katawan ko a da den a Tohan sa dalem a doniya a liyo ron a sisii sa Israil! Kapedipedi ka bo na tarimaa ngka so manga pamemegayan aken."

16 Ogaid na tig i Ilisas a "Matamataan ko kaooyagoyag o Allah a pepangongonotanan ko ka di ako den terima sa apiya antonaa." Na apiya pen tigel sekaniyan i Naaman na minda den.

17 "O di ka pagiyog," a tig i Naaman, "na kapedipedi ka bo na pakakowaa ko ngka sa bote a saden sa kekena o dow a manga mola a kewit aken ko inged aken. Ka ipoon

imanto na di ako den sepaat sa petotongen a soasoat o di na ba ako pekorban sii ko apiya antonaa a tohan, ka so bo so Allah.

18 Ogaid na pengini ko a karilaan ako o Allah sangkai a isa a betad a igira a somiyoled so dato a kadnan aken ko timplo o katohanan a Rimon a sodiyod on a aarain sekaniyan a barokan aken na pengnin ko a karilaan ako o Allah igira a pepekasodiyod ako ron mambo."

19 "Baling ka den sa da a rayorayo a ginawa," a tig i Ilisas.

Kagiya malo den kawatasan si Naaman

20 Na si Gihasi a talasogoay i Ilisas a nabi o Tohan na miyapamikir iyan a "Tanto a piyakalebodan o kadnan aken angkai a Isiriyanen a si Naaman ko da niyan katarimaa ko witowit iyan on. Na, matamataan ko kaoyagoyag o Allah ka keteden ko sekaniyan na kowa ako ron sa manga nganin."

21 Mandiyadi na pinggagaan i Gihasi kometed si Naaman. So kiyailaya on i Naaman a pepelalagoy rekaniyan na tomipad ko karo niyan a makipetoon on. "Mapipiya so langon taman?" a iniise iyan on.

22 "Mapiya den," a tig i Gihasi, "ogaid na siyogo ako o kadnan aken sa kapeteroa ko reka a aden a dow a kataw a mangoda a ped ko sagorompong a manga nabi a gopen miyakaoma a poon ko kapalawan a inged sa Ipraim. Na kabaya iyan a mbegan ka siran sa telo polo ago pat ka kilo a pirak ago dow a sokoba a nditaren."

23 "Kapedipedi ka bo na kowa ka sa pito ka kilo!" a tig i Naaman. Tigel iyan si Gihasi sa katarimaa niyan on, na tiyago iyan so pito ka kilo a pirak ko dow a sako na inirakes iyan on so dow a sokoba a nditaren na piyakiawidan iyan ko dow a oripen iyan, na inawidan iran a moon a siran ki Gihasi.

24 So kiyapakaoma i Gihasi ko bobongan a kakadenan i Ilisas na kinowa niyan ai ko manga oripen na initalapok iyan ko walay. Piyakakasoy niyan den so manga oripen na gomiyanat siran.

25 Ogaid na so kiyasoled i Gihasi ki Ilisas a miyadap on na iniise on i Ilisas a "Anda ka poon, Gihasi?"

"Da a siyongowan ko a oripen ka," a inisembag iyan.

26 Ogaid na pitero on i Ilisas a "Ba ngka di katawi a sisii reka so niyawa ko isako tompad so mama ko karo niyan a miyakitoona reka? Ba giyai i oras a kakowa sa pirak o di manga nditaren, manga asinda a olibi ago asinda a obas, manga bilibili, manga sapi o di na manga oripen a manga mama ago babay?"

27 Sabap sa pinggolaola ngka ini na kiogalin reka so bowa i Naaman ago sii ko kebabadan reka sa taman sa pakataman." Na miyawa roo si Gihasi ko hadapan i Ilisas, na miyabowa a so kobal iyan na lagid sa kapoti a giyaw.

2 MANGA DATO 6

So Kiyalelaw o Potaw a Olo o Patok

Miyakaisa a gawii na pitero o sagorompong a manga nabi ki Ilisas a "Ilaya ngka so darpa a petelabokan ami reka ka tanto rektano a maito.

2 Pakasonga kami ngka ko lawasaig a Yordan a ron pekakowa so oman i isa rekami sa tarakayo na mbalay tano roo sa darpa a kabalingan tano."

Na tig iyan a "Ikano roo den."

3 Na pitero o isa kiran a "Kapedipedi ka bo na onoti kami ngka a manga oripen ka."
"Magonot ako," a tig i Ilisas.

4 Na somiyong siran sa Yordan na miyamata siran sa manga kayo.

5 Sii ko kapepata on o isa kiran na miyaso so olo o patok iyan na miyaolog ko ig.
"Aidaw, kadnan ko!" a minigoraok iyan. "Piyانبayan oto!"

6 "Anda miyaolog?" a iniise o nabi o Tohan. So kiyapakiilain iyan on ko darpa a kiyaaologan on na miyotol sa giyoray si Ilisas na inolog iyan roo, na miyakaletaw so potaw.

7 "Kawaa ngka," a tig i Ilisas. Na kiyawa o mama na piyorot iyan.

Linitagan i Ilisas so Miyanga bobota a Isiriyenen

8 Sa masa oto na dii makitidawa so dato sa Siriya ko manga Israil. Igira a pepakamosawiren iyan so manga sanasanaan iyan na pepamili sekaniyan sa darpa a mbangonan iyan sa kampo o manga sondaro niyan.

9 Ogaid na dii teroon i Ilisas ko dato sa Israil a "Pananggalai ngka o ba ka makaokit sangkoto a darpa ka kekampo roo so manga Isiriyenen."

10 Na pepakipariksa o dato sa Israil angkoto a manga darpa a petendoon o nabi o Tohan. Omanoman pepakaiktiyaren i Ilisas so dato kaan iyan kalidasi angkoto a manga darpa.

11 Tanto ai a inikararangit o dato sa Siriya, na linimod iyan so manga sanasanaan iyan na iniise iyan kiran a "Ba niyo raken di matero o antawaa rekano i tomatampil ko dato sa Israil?"

12 "Da den a isa bo rekami, kadnan ko a dato," a tig o isa ko manga sanasanaan iyan.
"Ka si Ilisas a so nabi a sisii sa Israil na apiya so manga katero a di ngka dii teroon sii ko rowang ka na pepayagen iyan ko dato sa Israil!"

13 "Ikano roo na mbabanoga niyo o anda sekaniyan," a inisogo o dato, "kaan ako makasogo sa manga sondaro a ndakep on."

Na miyatero rekaniyan a "Sisii si Ilisas sa Dotan."

14 Sabap roo na somiyogo on so dato sa manga koda ago manga karo ago madakel a manga sondaro. Somiyong siran on ko kagagawii na linikopan iran so siti.

15 Sii ko kiyapakambowat o talasogoay o nabi o Tohan a lominiyo ko teked a kapipita na miyailay niyan so manga sondaro a rakes o manga koda ago manga karo iran a lomilikop ko siti. "Aidaw kadnan ko, antonaa i sowaan ta?" a tig iyan ki Ilisas.

16 "Di ka pekelek," a inisembag o nabi. "So kiaampil rekta na madakel a di so kiaampil kiran!"

17 Na miyangangarapan si Ilisas a tig iyan a "Ya Allah, lekai ngka a mata niyan kaan makailay!" Na likaan o Allah so mata o talasogoay na lomiyangkaw sa mbalabala na miyailay niyan so manga bobongan a mapepeno a pekedeg a manga koda ago manga karo a lomilibet ki Ilisas.

18 Sii ko kapetondagayi rekaniyan o manga ridoay na miyangangarapan si Ilisas ko Allah a tig iyan a "Pamotaa ngka a manga taw ai!" Na piyamota niyan siran a giyoto den so piyangni i Ilisas.

19 Na pitero kiran i Ilisas a "Kena ini a ba so lalan na kena ini a ba so siti. Tondoga ko niyo ka agaken ko sekano ko mama a di niyo dii mbabanogen." Na inagak iyan siran roo sa Samariya.

20 So kiyapakasoled iyan ko siti na piyangni i Ilisas a "Ya Allah, lekai ngka so manga mata angkai a manga mama kaan mamakailay!" Na likaan o Allah so manga mata iran na miyakailay siran, na kiyatokawan iran a sisii siran sa soled a Samariya.

21 So kiyailaya o dato sa Israil ko manga Isiriyanen na inilalis iyan ki Ilisas a "Ama ko, ba aken siran pemonoa! Ba aken siran pemonoa?"

22 "Di ngka siran pemonoa," a inisembag iyan. "Ba ngka mbonoa so manga taw a miyabiyag ka ko dii katidawa? Begi ngka siran sa pangenengken ago ig kaan siran makakan ago makainom ago mamakakasoy ko dato iran."

23 Na siyapaat iyan siran sa mala a kapista, na kagiya makapasad siran koman ago mamanginom na piyakabaling iyan siran ko kadnan iran. Sabap roo na so manga sondaro a Isiriyanen na initapelek iran so kapesondoli ko inged a Israil.

So Kiyataona ko siti a Samariya

24 Ogaid na da peman matey na si Bin Hadad a dato sa Siriya na tinimo iyan so langowan a sondaro niyan na somiyong siran sa Samariya na linikopan iran.

25 Sabap roo na tanto a tiyaon so siti ka miyabolobolo a kalilikopi ron taman sa so olo a kimar na dii mapesa sa walo polo a pelata a pirak, na isa ka libras a tai a marapatik na dii mapesa sa lima timan a pelata a pirak.

26 Miyakaisa a gawii a dii ndalakaw so dato sa Israil ko kilid o pangeleban o siti na tiyalowan sekaniyan o babay a tig iyan a "Hey dato a kadnan ko, tabangi ako ngka!"

27 Tig o dato a "O da ka tabangi o Allah na anda ko pekakowa sa kitabang aken reka? Ba aden a pereperan aken o di na arak?"

28 Antonaa i masosowa a ka?"

Inisembag o babay a "Pitero raken angkai a babay a 'Rilaan ka so wata a ka kaan ta makan imanto, na mapita na ken tano so wata aken.'

29 Na initinda ami so wata aken na kiyani ami. Kagiya telondog a gawii na pitero aken rekaniyan a 'Rilaan ka so wata a ka a ken tano,' ogaid na initapok iyan sekaniyan."

30 So kiyanega o dato ko manga katero o babay na kinisi iyan so gerab iyan ko kasososa a pamikiran iyan. Na so manga taw ko marani ko pangeleban na miyailay iran a ndiditar sekaniyan sa sako a mididalem ko kimon iyan.

31 Na pitero iyan a "Kamorkaan ako o Allah sa tanto a masopiit o di mapota so olo i Ilisas imanto a gawii!"

32 Na somiyogo sekaniyan sa makarapit ki Ilisas.

Samanaya na moontod si Ilisas sii ko walay niyan a ped iyan so manga pelokelokesen ko siti. Na pitero kiran i Ilisas a "Giyangkoto a talibono na somiyogo sa mama a makapota ko olo aken. Amay ka makaoma na talangeben iyo ron so pinto na di niyo pekasoleda. So dato a kadnan iyan na tomotondog on."

33 Sii ko di pen dii katero i Ilisas sii kiran na miyakaoma so dato na pitero iyan a "Giyangkai a morala na poon ko Allah! Ino aken pen penayawa so kapeseriat iyan?"

2 MANGA DATO 7

Somimbag si Ilisas a tig iyan a "Pamakinega niyo so katero o Allah. Giyai i pitero o Allah: Datar ai a oras mapita na so isa ka gantang a arina na mapepasa sa isa ka pelata a pirak, ago so dow a ka gantang a bantad na mapepasa sa isa ka pelata a pirak sii ko manga padian sa Samariya."

2 So olowan a sondaro a pepanalagad ko dato na pitero iyan ko nabi o Tohan a "Di ini mapenggolaola apiya pen o lekai o Allah so manga pintoan sa langit!"

Na tig i Ilisas a "So den so manga mata ngka i pekailay sii, ogaid na di ka on den pekakan!"

Kiyatamanan so Kalilikopi ko Siti

3 Samaoto na aden a pat kataw a aden a bowa niyan a komakaden ko gimowa o siti, na pitero o oman i isa ko ped iyan a "Ino tano sii keden taman sa matay tano?"

4 O gomegenek tano sii na pematay tano a ongos, na o somoled tano ko siti na ndodoo so taon na pematay tano a ongos. Na somong tano ko kampo o manga Isiriyenen na moral tano kiran. O pekapagoyaga tano iran na keoyag tano, na o bonoa tano iran na pematay tano baden."

5 Sii ko kaperimon na somiyong siran ko kampo o manga Isiriyenen. So kinisampay iran ko kilid o kampo na da den a ba roo taw

6 Ka piyakineg o Allah ko manga Isiriyenen so dalepek o madakel a manga karo ago manga koda ago makapal a manga sondaro. Na pitero o oman i isa ko ped iyan a "Ilaya ngka man, ka kiyatendanan o dato sa Israil so manga dato a Hitiyo ago Imisiren sa kanggobata iran rektano!"

7 Na mimbawat siran na miyamalagoy sii ko kaliboteng iyan pen. Inawaan iran so manga barombarong iran, manga koda iran ago manga kimar. Giyanatan iran so langon taman sii ko kampo a da den maalin na inipagapas iran a ginawa iran.

8 Kagiya misampay so pepanga bobowa ko kilid o kampo na somiyoled siran ko isa ko manga barombarong. Komiyang siran ago mininom na inawidan iran so manga pirak, manga bolawan ago manga nditaren, na miyawa siran roo a inipanapok iran oto. Na

komiyasoy siran na somiyoled ko ped a barombarong na kominowa siran peman ko manga nganin san na initalpok iran pen.

9 Ogaid na oriyen iyan na pitero o oman i isa ko ped iyan a "Di ontol so di tano dii nggolaolaan! Aden a mapiya a mapenotol tano imanto na ba tano den dii pagmaa. O nayaw tano taman sa mapita na peraoten tano a morala. Na, itano roo! Somong tano imanto ko torogan o dato na panotolen tano ron ai!"

10 Na komiyasoy siran ko siti na tiyalowan iran so manga gordiya ko gimowa iyan na pitero iran kiran a "Somiyong kami ko kampo o manga Isiriyenen na da den a isa bo a taw a ba ami miyailay aya pen o ba ami miyaneg ka so bo so kiiiket a manga koda ago manga kimar, ago so manga barombarong a giyanatan a da den maalin."

11 Na inipanawatewag o manga gordiya so total na minisampay ko torogan.

12 Mimbangon so dato ko kagagawii na pitero iyan ko manga sanasanaan iyan a "Teroon ko rekano o antonaa i ikidia rektano o manga Isiriyenen. Katawan iran a oongosan tano, na inawaan iran so kampo a petepok siran ko manga pangomaan, ka aya pipikiren iran na meliyo tano ko siti, na mbiyagen tano iran a oyagoyag na soled siran ko siti."

13 Ogaid na pitero o isa ko manga sanasanaan iyan a "Somogo tano roo sa manga mama a makaonot ko lima timan a koda a miyanga lalamba ko siti kaan iran mapariksa o antonaa i miyanggolaola. O mamatay siran na datar siran bo sa kapetay o langon a manga Israil a malalamba ko siti."

14 Mandiyadi na mitiyagar siran sa dow a karo a rakes o manga koda iran, na somiyogo so dato sa manga mama a makasono ko manga Isiriyenen a tig iyan a "Ikano roo na ilaya niyo o antonaa i miyanggolaola."

15 Na siyono iran siran taman sa lawasaig a Yordan, na miyailay iran a so langon o lalan na makakayar on so manga nditaren ago manga kasangkapan a miyamangilebad o manga Isiriyenen sii ko kadilapet a kapepalagoy iran. Na komiyasoy so manga sogo na piyanotol iran ai ko dato.

16 Na mililiyo so manga taw sa Samariya na pitebanan iran so kampo o manga Isiriyenen. Sabap roo na so isa ka gantang a arina na dii pesaan sa isa ka pelata a pirak, ago so dow a ka gantang a bantad na dii pesaan sa isa ka pelata a pirak a aya kiyatoman o pitero o Allah.

17 Initoro o dato so sondaro a pepanalagad rekaniyan a aya petendingan ko gimowa o siti, ogaid na minilampes sekaniyan ago pindapodapoan o manga taw a pepamangokit ko gimowa a aya niyan inipatay a giyoto so pitero o nabi o Tohan isako somong so dato ko walay niyan.

18 Minitoman den so miyaalamat o nabi o Tohan ko dato a "Datar ai a oras mapita na so isa ka gantang a arina na mapepasa sa isa ka pelata a pirak, ago so dow a ka gantang a bantad na mapepasa sa isa ka pelata a pirak sii ko manga padian sa Samariya."

19 Na aya miyatero o olowan a sondaro ko nabi o Tohan na "Di ini mapenggolaola apiya pen o lekai o Allah so manga pintoan sa langit!" Na aya inisembag on o nabi o Tohan na "So den so manga mata ngka i pekailay sii, ogaid na di ka on den pekakan!"

20 Na giyanan den i miyanggolaola rekaniyan, ka pindapodapoan o manga taw sii ko gimowa a aya niyan inipatay.

2 MANGA DATO 8

Minikasoy so Lopa o Babay sa Sonim

Miyatero gowani i Ilisas ko babay a so wata iyan a mama na inoyag iyan a "Lalakaw kano ago so pamiliya ngka na tareg kano pasin ko ped a darpa a ketaregan rekano, ka piyasad o Allah a teonen so inged sa katey a pito ragon.

2 Na ininggolalan o babay so pitero on o nabi o Tohan. Lomiyalakaw siran ago so pamiliya niyan na komiyaden sii ko inged o manga Pilistiyo sa miyakapito ragon.

3 Kagiya mapopos so pito ragon na komiyasoy so babay a poon ko inged o manga Pilistiyo na somiyong ko dato ka pengnin iyan on a mapakakasoy rekaniyan so walay niyan ago so lopa.

4 So dato na di niyan dii mbitiyarai si Gihasi a talasogoay o nabi o Tohan a tig iyan on a "Panotola ngka raken so langon a piyakamemesa a miyanggolaola i Ilisas."

5 Na so den so kapepanotola i Gihasi ko dato ko kiyaoyaga i Ilisas ko miyatay a wata a mama na aya den mambo kiyapakaoma o babay a ina o wata sa kapengniya niyan ko dato ko walay niyan ago lopa.

Na tig i Gihasi a "Giyai so babay, kadnan ko a dato, ago giyai so wata a inoyag i Ilisas!"

6 Iniise o dato ko babay so makapantag roo na piyanotol iyan on. Mandiyadi na somiyogo so dato sa sanasanaan makapantag ko inipenon o babay a tig iyan a "Kasowin ka on so langon taman a rek iyan a rakes on so langon a miyapantiyari ko lopa iyan ipoon ko gawii a kiyaawai niyan ko inged taman imanto."

Biyono i Hasail si Bin Hadad a Dato sa Siriya

7 Somiyong si Ilisas sa Damasko, na samanaya na pekesakit si Bin Hadad a dato sa Siriya. So kiyateroa ko dato a miyakaoma roo den si Ilisas

8 Na pitero iyan ki Hasail a "Awid ka sa pamemegayan na song ka ko nabi o Tohan na pangniya ngka on a kaisei niyan ko Allah o ba ako pekabager sangkai a paniyakit."

9 Na lomiyalakaw si Hasail a song ki Ilisas a maawid sa pamemegayan a pat polo a onta a kirororanan sa lebi a manga pipiya a nganin sii sa Damasko. Miyangadap sekaniyan ki Ilisas na tig iyan a "So wata a ka a si Bin Hadad a dato sa Siriya na siyogo ako niyan a ipagise aken reka o ba sekaniyan pekapiya ko paniyakit iyan."

10 Na pitero on i Ilisas a "Ika roo den na teroa ngka on a 'Mataan a pekapiya ka!' Ogaid na piyayag raken o Allah a aya mataan na petay sekaniyan."

11 Na tintengan sebenar i Ilisas si Hasail taman sa miyaya si Hasail. Na taros a somigad so nabi o Tohan.

12 "Ino pesegad so kadnan aken?" a iniise i Hasail.

"Ka kagiya katawan aken so manga piyakalekelek a penggolaolaan ka ko manga Israil. Totongen ka so kikokotaan a manga siti iran, pemnoon ka so manga kangodaan kiran,

ipemapes ka so manga roroni a wata iran ko lopa ago pemensiin ka so tiyan o manga oogat kiran a babay."

13 Tig i Hasail a "Andamanaya i kapenggolaola ko sangkoto a mala a galebek a matag ako baden aso?"

"Piyayag raken o Allah a kedato ka sa Siriya," a inisembag i Ilisas.

14 Na inawaan i Hasail si Ilisas na komiyasoy ko kadnan iyan. So kiyaisei ron i Bin Hadad a "Antonaa i pitero reka i Ilisas?" na inisembag i Hasail a "Pitero iyan raken a pekapiya ka."

15 Ogaid na sii ko telondog a gawii na kominowa si Hasail sa tanggob na inisomek iyan ko ig na inipiles iyan ko paras o dato taman sa miyatay. Na miyabaloy si Hasail a dato sa Siriya a miyakasambi ki Bin Hadad.

Si Yahoram a Dato sa Yodah

16 Sii ko ikalima ragon a kandadato i Yoram a wata i Ahab a dato sa Israil na si Yahoram a wata i Yahosapat i miyadato sa Yodah.

17 Telo polo ago dow a ragon a idad iyan ko kiyadato iyan, na miyakandato sa miyakawalo ragon sii sa Yarosalim.

18 Siyoson iyan so manga okitokit o manga dato sa Israil a lagid o pinggolaola o pamiliya i Ahab, ka so karoma niyan na aya wata a babay i Ahab. Na miyakanggolaola sekaniyan sa marata ko kapekeilaya on o Allah.

19 Ogaid na sabap ko oripen iyan a Daod na di kabaya o Allah o ba niyan binasaa a Yodah ka initopa niyan ko Daod a taman sa pakataman so dii kapakandato o manga moriyataw niyan.

20 Sii ko kandadato i Yahoram na so manga Idomiyan na somiyopak sa Yodah na tomiyoro siran sa dato iran.

21 Sabap roo na somiyong si Yahoram sa Sair sa kanggobata niyan on a rakes o langon o manga karo niyan. Ogaid na linikopan siran o manga Idomiyan, na sii ko kagagawii na miyakapalagoy si Yahoram ago so manga komandir o manga karo niyan, na miyamagapas so manga sondaro niyan ko manga walay iran.

22 Taman imanto na somosopak den a Idomiya sa Yodah. Na somiyopak mambo a siti a Libnah sangkoto den a masa.

23 So ped a miyanga sosowasowa ko kandadato i Yahoram ago so langon a pinggolaola niyan na palaya den misosorat ko 'Ribro a Totolan ko manga Dato sa Yodah.'

24 Kagiya matay si Yahoram na minilebeng ko pekoboran ko manga apo iyan sii ko siti o Daod. Na si Ahasiyas a wata iyan na aya on miyakasambi a dato.

Si Ahasiyas a Dato sa Yodah

25 Sii ko ikasapolo ago dow a ragon a kandadato i Yoram a wata i Ahab a dato sa Israil na si Ahasiyas a wata i Yahoram na miyadato sa Yodah.

26 Dow a polo ago dow a ragon a idad i Ahasiyas sii ko kiyadato iyan na mindato sa

miyakasaragon sii sa Yarosalim. Aya ngaran o ina iyan na si Ataliyas a wata i Ahab ago apo i Omri a dato sa Israil.

27 Siyoson iyan so manga okitokit o pamiliya i Ahab na miyakanggolaola sa marata ko kapekeilaya on o Allah a lagid o pamiliya i Ahab ka miyakamong sekaniyan i Ahab.

28 Si Ahasiyas na miyonot ki Yoram a wata i Ahab sa kinitidawaan iyan ki Hasail a dato sa Siriya roo sa Ramot Giliyad. Kiyapalian si Yoram sii ko kiyatidawa

29 Na komiyasoy sa Yasriil kaan makapiya ko pali iyan. Sii ko kandodoo niyan pen na mimbisita rekaniyan si Ahasiyas a dato sa Yodah sabap ko kiyapalii ron.

2 MANGA DATO 9

Kiyaidinan si Diho a Madato sa Israil

Piyakitawag o nabi Ilisas so isa ko sagorompong a manga nabi na pitero iyan on a "Tiyagar ka sa kasong ka sa Ramot Giliyad. Awidi ngka angkai a omoy a petegoan sa lana

2 Na amay ka misampay ka roo na mbanoga ngka si Diho a wata i Yahosapat ago apo i Nimsi. Belaga ngka sekaniyan ko manga ped iyan na wita ngka ko misisibay a rowang.

3 Kowaa ngka so omoy na ododa ngka so lana ko olo niyan na teroa ngka on a 'Siyalawatan ko seka a madato sa Israil!' Maipos ai na lekai ngka so paitaw na palalagoy ka a di pelangalangan!"

4 Na somiyong so kangodaan a nabi sa Ramot Giliyad.

5 So kiyapakaoma niyan na miyatoon iyan so manga olowan a sondaro a kioontod a titimotimo. Na tig iyan a "Aden a peteroon ko reka, komandir."

"Antawaa rekami?" a iniise i Diho.

"Seka, komandir," a tig iyan.

6 Na tominindeg si Diho na somiyoled siran a dow a ko walay. Inodod o nabi so lana ko olo i Diho a tig iyan a "Giyai i pitero o Allah a Tohan o Israil: Siyalawatan ko seka a madato ko manga pagtaw aken a Israil.

7 Kebinasa ngka so pamiliya i Ahab a kadnan ka, ka iseop aken so kiyapamonoa ko manga oripen aken a manga nabi ago so langon a ped a manga oripen aken a piyamoto i Disibil.

8 Kepolang so langon o pamiliya i Ahab. Pepasen ko so oman i mama ko pamiliya niyan sii sa Israil a oripen ago so di.

9 Mbalowin ko so pamiliya i Ahab a lagid o pamiliya i Yarobowam a wata i Nibat ago lagid o pamiliya i Baasa a wata i Ahidiyas.

10 Makapantag ki Disibil na pegdasan sekaniyan o manga aso sii ko isa a darpa sa Yasriil na da den a ba on pekalebeng.' " Na giyoto a lominiyo so kangodaan a nabi na miyalalagoy.

11 Sii ko kiyaliyowi i Diho ko manga ped iyan a manga olowan na iniise o isa on a "Mapipiya so langon taman? Ino reka song angkoto a pembetengen?"

Tig i Diho a "Katawan iyo so lagid anan a mama ago so di niyan dii perakorayan."

12 "Kena a ba nan benar," a tig iran. "Teroa ngka rekami!"

Na tig i Diho a "Pitero iyan raken a aya kabasa o Allah na "Siyalawatan ko seka a madato sa Israil."

13 So kiyanega iran sii na pinggagaan an iran komowa so manga gerab iran na kiyayat iran ko kaporoan o manga kerit a tindegan i Diho. Na piyakaoni ran so manga bogiyong ago milalalis sa "Dato si Diho!"

Biyono i Diho si Yoram a dato sa Israil

14-15 Na giyoto a si Diho a wata i Yahosapat ago apo i Nimsi na pikedyatan iyan sa marata so dato Yoram. (Samanaya na ndodoo si Yoram sa Yasriil kaan makapiya ko kiyapalii ron o manga Isiriyanen sii ko kiyatidawa a kiyalindinga i Yoram ago so manga sondaro niyan sa Ramot Giliyad ko kanggobata on i Hasail a dato sa Siriya.) Na pitero i Diho ko manga ped iyan a "O kabaya iyo a madato ako na da den a ba niyo pekaliyowa sangkai a siti a Ramot Giliyad a ba makasong sa Yasriil a ba roo makapenotol ko pinggolaola tano!"

16 Na mida si Diho ko karo niyan na somiyong sa Yasriil a ron pen dedeke si Yoram. Ndodoo mambo si Ahasiyas a dato sa Yodah ka somiyong roo a mintel rekaniyan.

17 So bantabantay a tomitindeg ko lantawa sii sa Yasriil na miyalangkaw niyan si Diho ago so manga taw niyan a pepekarani. Na tiyalowan iyan si Yoram a tig iyan a "Miyakailay ako sa manga sondaro a pepekatalingoma!"

"Sogo ka sa pakokoda a mbalak kiran," a inisogo i Yoram, "a ipagise iyan a 'Ba kalilintad a minitalingoma niyo?' "

18 Na lominiyo so pakokoda a mbalak ki Diho, na tig iyan on a "Giyai i pitero o dato: Ba kalilintad a minitalingoma ngka?"

"Antonaa i ikidia ngka ko kalilintad?" a inisembag i Diho. "Tondoga ko ngka!"

Na inipananalo o bantabantay a "Minisampay kiran so siyogo ogaid na da makakasoy."

19 Mandiyadi na somiyogo so dato sa ikadowa a pakokoda. So kiyapakaoma niyan na tig iyan a "Giyai i pitero o dato: Ba kalilintad a minitalingoma ngka?"

Tig i Diho a "Antonaa i ikidia ngka ko kalilintad? Tondoga ko ngka!"

20 Pitero o bantabantay a "Minisampay sekaniyan kiran ogaid na da mambo makakasoy. So pepangolin ko karo na lagid i Diho a wata i Nimsi, ka pepangolin a lagid o kasasaitanan a mama."

21 "Sangani niyo so karo aken!" a inisogo i Yoram. Na so kiyasangani ron na si Yoram a dato sa Israil ago si Ahasiyas a dato sa Yodah na lomiyog siran a mageeda ko oman i karo niyan sa kambalaka iran ki Diho, na miyabalak iran sii ko pangomaan a rek gowani i Nabot a taga Yasriil.

22 So kiyailaya i Yoram ki Diho na iniise iyan on a "Ba kalilintad a minitalingoma ngka, Diho?"

Tig i Diho a "Andamanaya i kakeaden o kalilintad taman sa mitataros den so kapanakoto ago kapangatao i ina a ka a Disibil?"

23 Na tomiyalikod si Yoram kaan makapalagoy a ipetelo niyan ki Ahasiyas a "Katipo, Ahasiyas!"

24 Na sarta a pikas i Diho so pana iyan na miyasogat iyan si Yoram ko pageletan a waga niyan. Lomiyambas so gasa ko poso iyan na miyaoteng sekaniyan sii ko karo niyan.

25 Pitero i Diho ki Bidkar a pangongolin ko karo niyan a "Porota ngka sekaniyan na lebaden ka ko pangomaan i Nabot a taga Yasriil. Tanodi ngka a isako mageeda ta sa manga karo ko talikodan i Ahab a ama iyan na pitero o Allah makapantag rekaniyan a

26 'Miyailay aken kagai so kiyapamonoa ki Nabot ago so manga wata iyan na mataan a pekibayadan ko rekano oto sangkai a pangomaan.' Na porota ngka sekaniyan na lebaden ka sangkai a lopa i Nabot a aya kaketoman o miyatero o Allah."

So Kiyabonoa ki Ahasiyas a dato sa Yodah

27 So den so kiyailaya i Ahasiyas a dato sa Yodah ko miyanggolaola na miyalagoy sekaniyan sii ko lalan a ipesong sa Bit Hagan. Piseloba sekaniyan i Diho a dii melalis a "Bonoa niyo pen!" Na piyalian iran sekaniyan ko karo niyan sii ko lalan a ipetekedeg sa Gor a marani sa Iblim. Ogaid na miyakagaga manaros si Ahasiyas taman sa Migido na miyatay roo.

28 So manga sanasanaan iyan na riyoran iran so lawas iyan sa karo na inowit iran sa Yarosalim na inilebeng iran ko pekoboran ko manga apo iyan sii ko siti o Daod.

29 (Miyabaloy si Ahasiyas a dato sa Yodah sii ko ikasapolo ago isa ragon a kandadato i Yoram a wata i Ahab.)

Biyono so Bai Disibil

30 Kagiya maneg i Disibil a miyakaoma si Diho sa Yasriil na pitiyalokan iyan a mata niyan ago tiyanor iyan so bok iyan na romiyongaw ko rowasan sii ko torogan.

31 So kiyapakasoled i Diho ko gimowa o torogan na liyalis i Disibil a tig iyan a "Ba kalilintad a minalingoma ngka? Lagid ka i Simri a miyono ko kadnan iyan!"

32 Na lomiyangag si Diho ko rowasan na initalo niyan a "Antawaa i magampil raken? Antawaa?" Na dowataman sa telo a orobarang na tomiyolong on.

33 Tig i Diho a "Itogen iyo sekaniyan sa baba!" Na iniitog iran a poon ko rowasan na miyamangitarsik so rogo iyan ko pangeleban ago sii ko manga koda, na pindapodapoan o manga koda so lawas iyan.

34 Somiyoled si Diho ko torogan na komiyan ago mininom. Na pitero iyan a "Siyapa niyo angkanaan a kiyamorkaan a babay na lebengen iyo, ka wata sekaniyan a dato."

35 Ogaid na so kiyaliyo iran sa kipelebengen on na so bo so lagas a olo niyan ago so manga ai niyan ago lima i miyatoon iran.

36 Komiyasoy siran ki Diho na pitero iran on, na tig iyan a "Giyai so pitero o Allah a nggolalan ko oripen iyan a Iliyas a taga Tisbi a 'Sii ko isa a darpa sa Yasriil na ron pegdasi o manga aso so sapo i Disibil.

37 So badan iyan na kelagid o nadis lopa roo sa Yasriil kaan da den a ba makapetero sa 'Giyai si Disibil.' "

2 MANGA DATO 10

So Kiyapamonoa ko Pamilya i Ahab

Samaoto na aden a pito polo a wata a mama i Ahab a mababaling sa Samariya. Na misorat si Diho sa manga sorat na inipakawit iyan ai sa Samariya sii ko manga olowan ko siti ago so manga pelokelokesen ago so manga tomatagikor ko manga wata i Ahab. Aya oni o sorat na

2 "Ndodoo rekano so manga wata o kadnan iyo, na aden a manga koda iyo ago manga karo, manga gomaan ago kikokotaan a siti. Na anda den i kisampay rekano angkai a sorat na

3 Pilia niyo so lebi a mapiya ago kapapatotan ko manga wata o kadnan iyo na baloya niyo a dato iyo. Maipos ai na tiyagar kano makitidawa sa kapelindinga niyo ko pamilya o kadnan iyo."

4 Ogaid na tanto a kiyalekan so manga olowan sa Samariya a tig iran a "So dow a dato na da makaato ki Diho! Na andamanaya i kakegagaa tano ron?"

5 Kagiya ka maoto na so komikibir ko torogan, so gobirnadador ko siti a rakes o ped a manga olowan ago so manga pepanagikor ko manga wata o dato na inipakawit iran angkai a sorat ki Diho: "Manga oripen kami ngka. Penggolaolaan ami so langon taman a peteroon ka. Di kami den toro sa apiya antawa onon a madato. Nggolaolaa ngka den so apiya antonaa i pipikiren ka a mapiya."

6 Mandiyadi na piyakawitan siran peman i Diho sa ikadowa a sorat a aya oni niyan na "O maampil kano raken ago peratiyayaan ako niyo na pangowita niyo raken sii sa Yasriil so manga olo o manga wata o kadnan iyo sa datar ai a oras mapita."

Samaoto na so pito polo kataw a manga wata o dato na sisii ko manga olowan ko siti a miyamakapagoyag kiran.

7 Na kagiya misampay kiran so sorat na kinowa iran so manga wata o dato na piyamono iran siran a pito polo kataw, na tiyago iran so manga olo iran ko manga reban na inipakawit iran ki Diho roo sa Yasriil.

8 Na miyatero ki Diho a "Miyapangowit iran sii so manga olo o manga wata o dato," na inisogo i Diho a "Ampira niyo sa dow a ampir roo ko gimowa o siti na begaken iyo roo taman ko kapipita."

9 Sii ko kiyapita iyan na lominiyo si Diho ko gimowa na pitero iyan ko manga taw a ndodoo a "Da a sala iyo sangkai a miyanggolaola. Saken i mikediyat ko kadnan aken ago miyono on. Ogaid na antawaa i miyono sii langon?"

10 Ketanged iyo imanto a da den a miyatero o Allah makapantag ko pamilya i Ahab a ba di kitoman. Initoman den o Allah so minitopa niyan a nggolalan ko oripen iyan a si Iliyas."

11 Na giyoto a piyamono i Diho so oman i isa a miyalamba ko pamilya i Ahab sii sa Yasriil a rakes o manga sanasanaan iyan, so manga madaseg a ginawai niyan ago so manga imam iyan a da den a ba niyan kiran piyakapagoyag.

Miyanga bobono so manga Tonganay o Dato Ahasiyas

12 Oriyan iyan na lomiyalakaw si Diho na miyantap sa Samariya. Sii ko kapelalakaw niyan roo ko darpa a bebetowan sa 'Kampo o manga Tomatagikor sa Bilibili'

13 Na miyabalak iyan so ped ko manga tonganay i Ahasiyas a dato sa Yodah. Iniise iyan kiran a "Antawaa kano?"

Tig iran a "Manga tonganay kami i Ahasiyas, na pesong kami sa Yasriil ka selamen ami so manga wata o dato Ahab ago so Bai Disibil."

14 "Dakepa niyo siran a oyagoyag," a inisogo i Diho ko manga taw niyan. Na diyakep iran siran a pat polo ago dow kataw na piyamoto iran sii ko paridi roo sa Bit Ikid. Da den a ba niyan kiran piyakapagoyag.

Miyanga bobono so Malalamba a manga Tonganay i Ahab

15 So kiyaawa iyan roo na biyalak iyan si Yahunadab a wata i Rikab a pelalakaw mambo a makipetona rekaniyan. Siyalam sekaniyan i Diho na pitero iyan on a "Magaayon ta sa pamikiran. Ba ako ngka pegampili?"

"Oway," a inisembag i Yahunadab.

"O ba giyoto," a tig i Diho, "na ita sii a lima ngka." Pinggolaola niyan ai na piyakada sekaniyan i Diho ko karo niyan.

16 Tig i Diho a "Onot ka raken na ilaya ngka so kasigi aken ko Allah." Na meeda siran a dow ko karo niyan taman sa Samariya.

17 So kiyapakaoma iran roo na piyamoto i Diho so langon a miyalamba ko pamiliya i Ahab; miyapolang iyan siran a aya kiyatoman o pitero o Allah a nggolalan ki Iliyas.

Miyanga bobono so Pepamanimba ko Baal

18 Oriyan iyan na tinimo i Diho so langon a taw sa Samariya na pitero iyan kiran a "Tanto a kapengongonotani aken ko katoanan a Baal a di so kiyapangongonotani ron i Ahab!"

19 Na pakisogoi niyo imanto so langon a manga nabi o Baal ago so langon a pepamanimba on ago so langon a manga imam iyan. Di niyo pelepasi apiya isa kiran bo ka aden a mala a kapekorban aken ko Baal. Saden sa di makadarpa na kebono." Ogaid na pepamagakal si Diho kaan iyan malengan mamono so langon a pepamanimba ko Baal.

20 Na inisogo i Diho a "Pakalangka niyo a kapelimolimod a ipeselasela ko Baal." Na piyakalangkap iran.

21 Mandiyadi na piyakitawag i Diho so langon a pepamanimba ko Baal sa dalem a Israil na miyakaoma siran langon; da den a isa kiran bo a ba roo da makadarpa. Na miyamanoled siran ko timplo o Baal taman sa miyapeno a manga taw ipoon ko sabala na malalagoy ko bala iyan.

22 Na tig i Diho ko somisiyap ko manga nditaren sii ko timplo a "Kowa ka sa manga kimon na begi ngka sa satiman so oman i pesimba ko Baal. Na inowitan iyan siran sa manga kimon.

23 Na somiyoled si Diho ko timplo o Baal a miyonot on si Yahunadab a wata i Rikab, na

pitero i Diho ko manga taw roo a "Pangilailay kano na tangkeda niyo a da a misasangi rekano a oripen o Allah, ka so bo so pepamanimba ko Baal."

24 Sa da pen roo kapakasoled i Diho sa kapekorban iyan ago katotong sa manga soasoat na piyakinggordiyaan iyan so liyo o timplo sa walo polo a manga mama a inilalang iyan kiran a "O aden a isa rekano a pakapalagowin iyan so isa bo ko manga taw a peladen ko rekano na kibayad iyan on a niyawa niyan."

25 So den so kiyapakapasad tomotong i Diho ko manga soasoat na inisogo iyan ko manga gordiya ago so manga olowan a "Soledi niyo siran na go niyo pamonoa! Da den a ba niyo ron pakapalagoya!" Na piyamoto iran siran langon a pedang na tiyoyok iran so manga bangkay iran sa liyo. Somiyoled siran ko rowang a katatagoan ko barahala a Baal sii ko timplo

26 Na iniliyo iran roo so manga barahala na tiyotong iran.

27 Riyopet iran so barahala a Baal na giba iran so timplo o Baal na biyaloy iran a pegodowan taman imanto.

28 Giyanan i kiyapakadaa i Diho ko kapesimbaa ko Baal roo sa Israil.

29 Ogaid na da niyan talikodi so manga dosa i Yarobowam a wata i Nibat a piyakisogok iyan pen ko manga Israil, a so kapesimbaa ko bolawan a manga nati a sapi roo sa Bitil ago sa Dan.

30 Na pitero o Allah ki Diho a "Pinggolaola ngka so mapiya ko kapekeilaya ko ron ka ininggolalan ka so langon a miyapamikir aken a ipendaneg ko pamilya i Ahab. Sabap roo na so manga moriyataw ngka na aya den makapendato sa Israil taman ko ikapat ka apid."

31 Apiya pen oto na da den tomana i Diho so manga sogoan o Allah a Tohan o Israil sa iklas ko poso iyan, ka da niyan talikodi so manga dosa i Yarobowam a piyakisogok iyan ko manga Israil.

So Kiyapatay i Diho

32 Sii sangkoto a manga gawii na pipoonan o Allah a kapelebati niyan ko kaolad a Israil.

Si Hasail a dato sa Siriya na tiyaban iyan so manga Israil ko langon a masasakop iran

33 Roo sa sebangan a Yordan ipoon sa siti a Arowir ko kilid a lawasaig a Arnon roo sa pagabagatan taman sa manga inged a Basan ago Giliyad roo sa pagotaraan (giyoto so babalingan o manga mbatabataa Gad, Robin ago Manasih).

34 So ped a miyanga sosowasowa ko kandadato i Diho ago so langon a pinggolaola niyan ago miyanga papasad iyan na palaya den misosorat ko 'Ribro a Totolan ko manga Dato sa Israil.'

35 Miyatay si Diho na minilebeng roo sa Samariya, na si Yahowahas a wata iyan i miyakasambi on a dato.

36 Miyakadowa polo ago walo ragon a kandadato i Diho sa Israil sii sa Samariya.

2 MANGA DATO 11

Si Ataliyah a Bai sa Yodah

Si Ataliyah a ina i Ahasiyas a dato sa Yodah na kagiya katokawan iyan a miyatay so wata iyan na piyaki pamono iyan langon so pamilya o dato.

2 Ogaid na si Yahosiba a wata a babay i dato Yahoram ago pagari i Ahasiyas na tikew niyan si Yowas a so maroni a wata i Ahasiyas a poon ko ped a manga wata o dato a magaan den mabono. Na initapok iyan so wata ago so peritan on ko pageemaan a rowang sabap ki Ataliyah, na da sekaniyan mapatay.

3 Na mitetapok den so wata a rakes o peritan on sii ko Timplo o Allah ko soled o miyakanem ragon sii ko kandadato pen i Ataliyah ko inged.

So Kiyasopaka ki Ataliyah

4 Sii ko ikapito ragon na si Yahoyada a imam na piyakisogoan iyan so manga olowan o manga gordiya ko dato ago so manga gordiya ko torogan na inowit iyan siran ko Timplo o Allah. Miyakipesadanowa kiran si Yahoyada roo ko Timplo na piyakisepa iyan kiran a tempil siran on. Na giyoto a piyakiilay niyan kiran so wata o dato a si Yowas.

5 Na inisogo iyan kiran a "Giyai i penggolaolan iyo: so ikatelo bagi rekano a dii nggagalebek ko Gawii a Idedeke na aya penggordiya ko torogan o dato,

6 So isa a ikatelo bagi rekano na penggordiya ko Gimowa a Sor, na so isa pen a ikatelo bagi na sii ko gimowa ko talikodan o manga gordiya ko torogan.

7 Na so dowo reka lompok a da a galebek iyan ko Gawii a Idedeke na penggordiya ko Timplo o Allah kaan malinding so dato.

8 Tindeg kano ko melilibeta ko dato a so oman i isa rekano a kakapetan iyan so gomaan iyan. Apiya antawaa i ndaseg rekano na kebono. Oobaya niyo lalayon so dato apiya anda pesong."

9 Na pinggolaola o manga olowan a sondaro so langon a inisogo kiran i Yahoyada a imam. Oman i isa kiran na kinowa niyan so manga sondaro niyan a so siran oto a penggalebek ko Gawii a Idedeke ago so manga pendeke ko galebek na miyamanong siran ki Yahoyada a imam.

10 Inibegay niyan ko manga olowan so manga bangkaw ago manga kelong a rek gowani o dato Daod a matatago ko Timplo o Allah.

11 Na tominindog so manga gordiya ko melilibeta ko dato a kakapetan o oman i isa so gomaan iyan a marani siran ko aparang ago so Timplo a ipoon ko pagabagatan a kilid iyan taman ko pagotaraan a kilid iyan.

12 Na iniliyo i Yahoyada si Yowas a wata o dato na tiyago iyan on so sangkad na piyalad iyan on so kopiya o kapasadan o Allah. Inipanawatewag iyan a sekaniyan na dato na siyalawatan iyan. Mindaopay so manga taw ago milalalis a tig iran a "Mamboway so Dato!"

So Kiyapatay i Ataliyah

13 Miyaneg i Ataliyah so bogembog o manga gordiya ago so manga taw na somiyong sekaniyan ko Timplo a ron siran matitimo.

14 Miyailay niyan a ndodoo so dato a tomitindog ko obay o polaos ko gimowa o Timplo a aya iran adat ko kapegidini ko dato. So manga olowan ago manga pamomogiyong na

lomilibet ko dato, na so langon o manga taw na pepanga bababaya ago pepemogiyong. Na kinisi i Ataliyah so kimon iyan na milalis a tig iyan a "Katipo! Katipo!"

15 Na siyogo i Yahoyada so manga olowan a sondaro a tig iyan a "Liyon iyo sekaniyan ko lamalama o Timplo na bonoa niyo so apiya antawaa i petepeng on manabang. Di patot o ba sekaniyan mabono sii ko Timplo o Allah."

16 Na diyakep iran na inowit iran ko ipesoled o manga koda ko lamalama o torogan na roo iran biyono.

So Kiyapakaasala i Yahoyada ko Paratiyaya ko Allah

17 Mandiyadi na mimbaal si Yahoyada sa kapasadan mipantag ko Allah ago so dato ago so manga taw a siran den so manga pagtaw o Allah. Mimbaal sekaniyan pen sa kapasadan mipantag ko dato ago so manga pagtaw niyan.

18 Na so langon a taw ko inged na somiyong siran ko timplo o Baal na giba iran. Piroropet iran so manga aparang ago so manga barahala na biyono iran si Matan a imam ko Baal sii ko danga o manga aparang.

Piyakitamengan i Yahoyada sa manga gordiya so Timplo o Allah.

19 Na sekaniyan ago so manga olowan a sondaro, so manga gordiya ko dato, so manga gordiya ko torogan ago so langon a taw ko inged na inidolog iran so dato ipoon ko Timplo taman ko torogan o dato a roo siran miyokit ko gimowa o manga gordiya. Miyontod si Yowas ko korsi

20 Na miyanga bababaya so langon a manga taw. Na lomilintad so siti sabap sa miyabono si Ataliyah roo ko torogan o dato.

21 Pito ragon a idad i Yowas ko kiyapoon iyan ndato.

2 MANGA DATO 12

Inompiyaan i Yowas so Timplo o Allah

Sii ko ikapito ragon a kandadato i Diho sa Israil na miyabaloy si Yowas a dato sa Yodah, na miyakandato sekaniyan sa miyakapat polo ragon sii sa Yarosalim. Aya ngaran o ina iyan na si Sibiyas a taga Birsiba.

2 Miyakanggolaola si Yowas sa ontol ko kapekeilaya on o Allah ko langon o manga ragon a kapegosiyati ron i Yahoyada a imam.

3 Ogaid na da mabinasa so manga aparang ko manga barahala sii ko manga bobongan na ipeteros o manga taw so di iran on dii kakorban ago kapetotong on sa doka.

4 Na pitero i Yowas ko manga imam a "Timoa niyo so langon a pirak a pegowiten ko Timplo o Allah a rakes on so manga bowis, manga diyakat ago so manga iklas a pamemegayan ko Timplo.

5 So oman i imam i matao ko pirak a pegowiten on roo o manga kalayama iyan, na keosar iyan ai ko kapagompiyai ko apiya antonaa a kiyabinasaan ko Timplo."

6 Ogaid na sii ko ikadowa polo ago telo ragon a kandadato i Yowas na da den a ba inompiyaan o manga imam ko Timplo.

7 Sabap roo na piyakitawag o dato Yowas si Yahoyada ago so ped a manga imam na

iniise iyan kiran a "Ino niyo da ompiyai so kiyabinasaan ko Timplo? Ipoon imanto na kena o ba sekano den i petego ko pirak a ipembegay rekano ka began iyo baden a kiompiya ko Timplo."

8 Na miyayon roo so manga imam a di siran den penimo peroman sa pirak a poon ko manga taw ago kena den a ba siran i pekaompiya ko Timplo.

9 Mandiyadi na kominowa si Yahoyada sa kaban na pisowan iyan so lekeb iyan. Tiyago iyan ko makakawanan o aparani sii ko ipesoled ko Timplo. Na so manga imam a petemeng ko gimowa iyan na petegoon iran ko kaban so langon a pirak a pegowiten ko Timplo.

10 Na igira a miyakadakil den a pirak on na pekowaan oto o panonorat sa torogan ago so maporo a imam na pembilangan iran so pirak a miyawit ko Timplo na petegoon iran ko manga sako.

11 Igira a miyatendo so kadakil iyan na ipembegay iran ai ko manga tetandingan ko galebek ko Timplo a ron iran pesokayi so kigagalebek a so manga panday sa kayo, so manga penagombalay,

12 So manga paniniminto ago so manga pananapil sa ator. Pepamasa siran sa manga tarakayo ago manga ator a ipegompiya ko Timplo ago so langon a penggastowan sa kapekaasala on.

13 So pirak a pegowiten ko Timplo o Allah na da manggasto ko kapangembaal sa manga tagayan a pirak, manga ipetenor ko sombowan, manga ladiya, manga bogiyong o di na so ped a manga kasangkapan a bolawan o di na pirak a pegosaren ko Timplo

14 Ka ipesokay ai ko kigagalebek ago so manga gasto ko kapegompiyai ko Timplo.

15 So manga tetandingan a pembegan sa pirak a ipesokay ko kigagalebek na da kiran den paliyogat so kipesoraten iran ko kiyasara ko pirak a imbegay kiran ka kasarigan siran.

16 Ogaid na so pirak a pepanekaten pantag ko ipesepaat a ipepapas ko kasalaan ago dosa na kena a ba pegowita ko Timplo ka rek ai o manga imam.

So Kaposan o Kandadato i Yowas

17 Sa masa oto na si Hasail a dato sa Siriya na gomiyobat sa siti a Gat na miyaagaw niyan. Oriyan iyan na miyantap sekaniyan gomobat sa Yarosalim.

18 Ogaid na si Yowas a dato sa Yodah na kinowa niyan langon so soti a manga nganin a inisenggay ko Allah o manga apo iyan a si Yahosapat, si Yahoram ago si Ahasiyas a manga dato sa Yodah a rakes o manga inisenggay niyan on ago so pen so langon a bolawan a matatago ko petimoan sa tamok ko Timplo o Allah ago sii ko torogan o dato na piyakiwit iyan ai a pamemegayan ki Hasail a dato sa Siriya, na da niyan bo tarosi a Yarosalim.

19 So ped a miyanga sosowasowa ko kandadato i Yowas ago so langon a pinggolaola niyan na palaya den misosorat ko 'Ribro a Totolan ko manga Dato sa Yodah.'

20 Na so manga sanasanaan iyan na piyagopakatan iran sekaniyan sa marata na biyono iran sii sa Bit Milo sii ko lalan a ipesong sa Sila.

21 So manga miyono on na si Yosakar a wata i Simiyat ago si Yahosabad a wata i Somir. Na minilebeng si Yowas ko pekoboran ko manga apo iyan sii ko siti o Daod. Na si Amasiyas a wata iyan i miyakasambi on a dato.

2 MANGA DATO 13

Si Yahowahas a Dato sa Israil

Sii ko ikadowa polo ago telo ragon a kandadato i Yowas a wata i Ahasiyas a dato sa Yodah na si Yahowahas a wata i Diho na miyadato sa Israil sii sa Samariya, na miyakandato sa miyakasapolo ago pito ragon.

2 Miyakanggolaola sekaniyan sa marata ko kapekeilaya on o Allah ka siyoson iyan so manga dosa i Yarobowam a wata i Nibat a piyakisogok iyan pen ko manga Israil, na da niyan den ai talikodi.

3 Sabap roo na tanto a kiyarangitan o Allah a Israil na omanoman iyan siran pepakitaban ki Hasail a dato sa Siriya ago si Bin Hadad a wata iyan.

4 Miyangangampedian si Yahowahas ko Allah na piyakineg sekaniyan o Allah ka miyailay niyan so tanto a masarangit a kapesonsinga o dato sa Siriya ko manga Israil.

5 Na bigan siran o Allah sa pekasabet a miyakapokas kiran ko kapaar o manga Isiriyen. Na lomilintad so kapepaginetaw o manga Israil a lagid gowani.

6 Apiya pen oto na itataros iran baden somowa so manga dosa o dato Yarobowam a piyakisogok iyan ko manga Israil. So pen so barahala o katohanan a Asirah na ndodoo den sa Samariya.

7 Aya bo a miyalamba ko manga sondaro i Yahowahas na so lima polo a pangongoda, sapolo a manga karo ago sapolo nggibo a sondaro a pelalag ka piyaminasa siran o dato sa Siriya a pindapodapoan iyan siran a lagid o bayanek.

8 So ped a miyanga sosowasowa ko kandadato i Yahowahas ago so langon a pinggolaola niyan ago miyanga papasad na palaya den misosorat ko 'Ribro a Totolan ko manga Dato sa Israil.'

9 Na miyatay si Yahowahas a inilebeng roo sa Samariya, na si Yowas a wata iyan i miyakasambi on a dato.

Si Yowas a Dato sa Israil

10 Sii ko ikatelo polo ago pito ragon a kandadato i Yowas sa Yodah na si Yowas a wata i Yahowahas i miyadato sa Israil sii sa Samariya, na miyakandato sa miyakasapolo ago nem ragon.

11 Miyakanggolaola sekaniyan sa marata ko kapekeilaya on o Allah. Da niyan talikodi so langon a manga dosa i Yarobowam a wata i Nibat a piyakisogok iyan pen ko manga Israil ka initaros iyan den ai.

12 So ped a miyanga sosowasowa ko kandadato i Yowas ago so langon a pinggolaola niyan ago miyanga papasad a rakes on so kiyapakitidawa iyan ki Amasiyas a dato sa Yodah na palaya den misosorat ko 'Ribro a Totolan ko manga Dato sa Israil.'

13 Kagiya matay si Yowas na inilebeng roo sa Samariya ko pekoboran ko manga dato sa Israil. So wata iyan a si Yarobowam na aya on miyakasambi a dato.

So Kiyapatay o Nabi Ilisas

14 Sa masa oto na miyasakit si Ilisas ko paniyakit a inipatay niyan. Si Yahowas a dato sa Israil na mintel rekaniyan na gomiyoraok on a tig iyan a "Ama aken! Ama aken! Seka i mala i gees a pelinding sa Israil!"

15 Na tig i Ilisas a "Kowa ka sa pana ago manga gasa," na kinowa niyan.

16 "Irata ngka so pana," a tig i Ilisas ko dato sa Israil. So kiyairata niyan on na inidapenet i Ilisas a manga lima niyan ko manga lima o dato.

17 "Lekai ngka so rowasan sa tampar sa sebangan," a tig i Ilisas, na lika-an iyan. "Panaan ka so gasa!" a tig iyan, na inipana iyan. Na pitero i Ilisas a "Giyoto so domadaag a gasa o Allah, a so gasa a pekataban sa Siriya! Ka tarotop a kakebinasaa ngka ko manga Isiriyanen roo sa Apik."

18 Tig pen i Ilisas ko dato a "Kowaa ngka so ped a manga gasa na ilambit ka ko lopa." Na miyakatelo niyan lambita so lopa na gominek.

19 Kiyarangitan sekaniyan o nabi o Tohan a tig iyan on a "Aya mapiya na makalima o di na makanem ka malambit so lopa! O giyanan na tebanen ka a Siriya taman sa tarotop a kambinasaa ngka on. Ogaid na imanto na makatelo ngka baden mataban."

20 Na miyatay si Ilisas na minikobor.

Oman pangolaon na pesondolan a Israil o manga sondaro a Mowabiyo.

21 Miyakaisa alongan na pekobor so manga Israil sa mama na tekaw den a miyakailay siran sa sagorompong a manga Mowabiyo a penggobat. Na inilebad iran so badan o mama ko kobor i Ilisas. Na so den so kiniseko o badan iyan ko manga tolan i Ilisas na miyaoyag so mama na tominindeg.

So dii Katidawa a Israil ago giya Siriya

22 Si Hasail a dato sa Siriya na sosonsingen iyan so manga Israil ko tenday a kandadato i Yahowahas.

23 Ogaid na inikalimo siran o Allah ago inipangalinggagaw niyan. Tiyago iyan siran sa ginawa sabap ko kapasadan iyan ko Ibrahim, Iskak ago so Yakob. Na taman imanto na di niyan kabaya o ba niyan siran binasaa aya pen o ba niyan bowangen.

24 Miyatay si Hasail a dato sa Siriya na si Bin Hadad a wata iyan i miyakasambi on a dato.

25 Samaoto na si Yahowas a dato sa Israil na miyabawi iyan ki Bin Hadad so manga siti a miyaagaw i Hasail ki Yahowahas a ama i Yahowas sii ko katidawa. Tiyaban i Yahowas si Bin Hidad sa miyakatelo na miyakowa niyan peman so manga siti sa Israil.

2 MANGA DATO 14

Si Amasiyas a Dato sa Yodah

Sii ko ikadowa ragon a kandadato i Yahowas a wata i Yahowahas sii sa Israil na si Amasiyas a wata i Yowas a dato sa Yodah na mipoon ndato.

2 Miyakadowa polo ago lima ragon a idad iyan ko kiyandato iyan na miyakandato sii sa

Yarosolim sa miyakadowa polo ago siyaw ragon. Aya ngaran o ina iyan na si Yahowadin a taga Yarosalim.

3 Miyakanggolaola sekaniyan sa ontol ko kapekeilaya on o Allah ogaid na kena a ba datar o pinggolaola o Daod a apo iyan ka siyoson iyan baden so langon taman a pinggolaola o ama iyan a si Yowas.

4 Da mabinasa so manga aparang sii ko manga bobongan na itataros o manga taw so di iran on dii kakorban ago kapetotong on sa doka.

5 Kagiya makambeken den so dii kandato i Amasiyas na piyamoto iyan so manga sanasanaan a miyamoto ki ama iyan a dato.

6 Ogaid na da niyan peda mamono so manga wata o manga miyamoto ka tiyoman iyan so minisorat ko Kitab o Mosa a "Di kebono so ama a ba sabap ko dosa o wata iyan aya pen o ba bonoa so wata a ba sabap ko dosa o ama iyan. Ka aya bo a kibono ko taw na so rek iyan a dosa."

7 Miyakatapay si Amasiyas sa sapolo nggibo a manga Idomiyan roo sa Balintad a Timos. Inagaw niyan a siti a Siloh sii ko kiyatidawa na bitowan iyan sa Yoktiil a aya niyan den ngaran taman imanto.

8 Samaoto na miyakawit si Amasiyas sa lalag ko dato sa Israil a si Yahowas a wata i Yahowahas ago apo i Diho ka inerar iyan sa katidawa.

9 Ogaid na aya inisembag i Yahowas ki Amasiyas na "Aden a sampingit roo sa kapalawan sa Libanon a pitero iyan ko kayo a sidro a 'Pakipangaromaan ka so wata a ka a babay ko wata aken a mama.' Ogaid na somiyagad roo a maila a binatang na liyagosak iyan angkoto a sapingit.

10 Mataan a tiyaban ka a Idomiya na miyangimporoan ka. Patot a ikesoat ka so kiyapakadaag ka a gegenek ka baden sa walay. Ino ka pegaden sa samok a ikebinasa ngka ago so manga taw sa Yodah?"

11 Ogaid na da ini tagoa sa ginawa i Amasiyas. Sabap roo na tinimo i dato Yahowas so manga sondaro niyan sa kanggobata iran ki Amasiyas na miyakasengata siran sii sa Bit Simis sa Yodah.

12 Miyataban o manga Israil so manga sondaro i Amasiyas na miyamalagoy siran langon a mimbabaling.

13 Miyabiyag i Yahowas si Amasiyas roo sa Bit Simis; na taros a siyondolan iyan a Yarosalim na giba iyan so pangeleban on ipoon ko Gimowa a Ipraim taman ko Gimowa ko Rogo, a dowo gatos ka mitros a katas iyan.

14 Kinowa niyan so langon a bolawan ago pirak ago so manga kasangkapan a miyatoon iyan ko Timplo o Allah ago sii ko petegoan sa tamok ko torogan o dato. Miyamiyag sekaniyan pen sa manga taw na komiyasoy sa Samariya.

15 So ped a miyanga sosowasowa ko kandadato i Yahowas ago so manga pinggolaola niyan ago miyanga papasad iyan taman ko kiyapakitidawa iyan ki Amasiyas a dato sa Yodah na palaya den misosorat ko 'Ribro a Totolan ko manga Dato sa Israil.'

16 Kagiya matay si Yahowas na inilebeng ko pekoboran ko manga dato sa Israil sii sa Samariya. Na so wata iyan a si Yarobowam i miyakasambi on a dato.

So Kiyapatay i Amasiyas

17 Si Amasiyas a wata i Yowas a dato sa Yodah na pepaginetaw pen ko miyakasapolo ago lima ragon ko kiyaiapos o kiyapatay i Yahowas a dato sa Israil.

18 So ped a miyanga sosowasowa ko kandadato i Amasiyas na misosorat ko 'Ribro a Totolan ko manga Dato sa Yodah.'

19 Piyagopakatan si Amasiyas sa marata roo sa Yarosalim na miyagapas sekaniyan sa Lakis. Ogaid na siyono o manga ridoay niyan na biyono iran roo.

20 Inikasoy iran sekaniyan sa Yarosalim a rororanen ko koda na inilebeng iran sii ko pekoboran ko manga dato sii ko siti o Daod.

21 Na kinowa o langon a taw sa Yodah so wata i Amasiyas a si Osiyas a aya idad iyan na sapolo ago nem ragon na biyaloy iran a dato a somiyambi ki ama iyan.

22 Sekaniyan i miyangon peroman sa siti a Ilat a piyakaasal iyan ai a sakop a Yodah ko kiyaiapos o kiyapatay o ama iyan.

Si Yarobowam a dato sa Israil

23 Sii ko ikasapolo ago lima ragon a kandadato i Amasiyas a wata i Yowas sa Yodah na si Yarobowam a wata i Yahowas a dato sa Israil na mipoon ndato sii sa Samariya na miyakandato sa miyakapat polo ago isa ragon.

24 Miyakanggolaola sekaniyan sa marata ko kapekeilaya on o Allah a da niyan talikodi so langon a manga dosa i Yarobowam a wata i Nibat a piyakisogok iyan pen ko manga Israil.

25 Sekaniyan i miyakaasal ko manga temanaan a Israil ipoon sa Libo Hamat na taman ko Maatay a Ragat a aya kiyatoman o initopa o Allah a Tohan o Israil a nggolalan ko oripen iyan a si Yonas a wata i Amitay a so nabi a taga Gat Hipir.

26 Ka miyailay o Allah o ay kapait o kapekeromasay o langon a manga Israil a da den a ba kiran pekaogop.

27 Na sabap sa da den mapamikir o Allah a ba niyan papasa so ngaran a Israil ko dalem a doniya na siyabet iyan siran a nggolalan ko kapaar i Yarobowam a wata i Yowas.

28 So ped a miyanga sosowasowa ko kandadato i Yarobowam ago so langon a pinggolaola niyan ago so kiyapakitidawa iyan a rakes on so kiyapakaasala niyan sa Damasko ago giya Hamat a sakop a Israil na palaya den misosorat ko 'Ribro a Totolan ko manga Dato sa Israil.'

29 Miyatay si Yarobowam na inilebeng ko pekoboran ko manga dato sa Israil, na si Sakariyas a wata iyan na aya on miyakasambi a dato.

2 MANGA DATO 15

Si Osiyas a Dato sa Yodah

Sii ko ikadowa polo ago pito ragon a kandadato i Yarobowam a dato sa Israil na si Osiyas a wata i Amasiyas na mipoon ndato sa Yodah.

2 Sapolo ago nem ragon a idad iyan isako mabaloy a dato, na miyakandato sa miyakalima

polo ago dow a ragon sii sa Yarosalim. Aya ngaran i ina iyan na si Yakoliyas a taga Yarosalim.

3 Miyakanggolaola sekaniyan sa ontol ko kapekeilaya on o Allah a lagid o ama iyan a si Amasiyas.

4 Ogaid na da mabinasa so manga aparang ko manag barahala sii ko manga bobongan na ipeteros o manga taw so di iran on dii kakorban ago so kapetotong on sa doka.

5 Piyakasekit o Allah si Osiyas na pekebowa sekaniyan ko tenday a omor iyan. Miyaling sekaniyan ko misisibay a walay na si Yotam a wata o dato na aya tetandingan ko torogan, na pinggobirnowan iyan so manga pagtaw ko inged.

6 So ped a miyanga sosowasowa ko kandadato i Osiyas ago so langon a pinggolaola niyan na palaya den misosorat ko 'Ribro a Totolan ko manga Dato sa Yodah.'

7 Miyatay si Osiyas na minilebeng ko pekoboran ko manga apo iyan sii ko siti o Daod, na si Yotam a wata iyan na aya on miyakasambi a dato.

Si Sakariyas a Dato sa Israil

8 Sii ko ikatelo polo ago walo ragon a kandadato i Osiyas sa Yodah na si Sakariyas a wata i Yarobowam na miyadato sa Israil na miyakandato sa miyakanem olan.

9 Miyakanggolaola sekaniyan sa marata ko kapekeilaya on o Allah a datar o manga apo iyan. Da niyan talikodi so manga dosa i Yarobowam a wata i Nibat a piyakisogok iyan pen ko manga Israil.

10 Si Siyalom a wata i Yabis na pikedyatan iyan sa marata si Sakariyas na biyono iyan ko kamamasai ron o madakel a taw na siyambian iyan sekaniyan a dato.

11 So ped a miyanga sosowasowa ko kandadato i Sakariyas na misosorat ko 'Ribro a Totolan ko manga Dato sa Israil.'

12 Minitoman den so miyatero o Allah ki Diho a "So manga moriyataw ngka na aya makapendato sa Israil taman ko ikapat ka apid."

Si Siyalom a Dato sa Israil

13 Si Siyalom a wata i Yabis na miyabaloy a dato sa Israil sii ko ikatelo polo ago siyaw ragon a kandadato i Osiyas sa Yodah na miyakandato sa miyakasaolan sii sa Samariya.

14 Samanaya na si Minahim a wata i Gadi na somiyong sa Samariya a poon sa Tirsah na biyono iyan roo si Siyalom a wata i Yabis na somiyambi on a dato.

15 So ped a miyanga sosowasowa ko kandadato i Siyalom a rakes on so kiyakadiyat iyan sa marata na misosorat ko 'Ribro a Totolan ko manga Dato sa Israil.'

16 Sa masa oto na bininasa i Minahim a siti a Tapowah ago so mbabalibeta on a manga inged a rakes o manga taw ron taman sa Tirsah ka kagiya da iran sekaniyan pakasoleda ko siti. Apiya so kikaogot a babay na piyamensi iyan so manga tiyan iran.

Si Minahim a Dato sa Israil

17 Si Minahim a wata i Gadi na mipoon ndato sa Israil sii ko ikatelo polo ago siyaw

ragon a kandadato i Osiyas sa Yodah, na miyakandato sa miyakasapolo ragon sii sa Samariya.

18 Miyakanggolaola sekaniyan sa marata ko kapekeilaya on Allah. Sii ko langon o masa a kandadato iyan na da niyan talikodi so manga dosa i Yarobowam a wata i Nibat a piyakisogok iyan pen ko manga Israil.

19 Samaoto na si Tiglat Pilisir a dato sa Asiriya na gomiyobat sa Israil. Ogaid na migay rekaniyan si Minahim sa telo polo ago pat nggibo ka kilo a pirak ka miyakitabang on si Minahim kaan makambeken so kandadato niyan sa Israil.

20 Piyanekat i Minahim angkai a pirak ko manga kawasa a taw sa Israil. Tigel iyan so oman i isa on sa kapakabayad iyan sa tenga sa kilo a pirak a imbegay ko dato sa Asiriya. Sabap roo na da panareg si Tiglat Pilisir sa Israil na miyaling ko inged iyan.

21 So ped a miyanga sosowasowa ko kandadato i Minahim ago so langon a pinggolaola niyan na palaya den misosorat ko 'Ribro a Totolan ko manga Dato sa Israil.'

22 Miyatay si Minahim na si Pikahtiyas a wata iyan na aya on miyakasambi a dato.

Si Pikahtiyas a Dato sa Israil

23 Si Pikahtiyas a wata i Minahim na mipoon ndato sa Israil sii ko ikalima polo ragon a kandadato i Osiyas sa Yodah. Na miyakandato sekaniyan sa miyakadowa ragon roo sa Samariya.

24 Miyakanggolaola sekaniyan sa marata ko kapekeilaya on o Allah. Da niyan talikodi so manga dosa i Yarobowam a wata i Nibat a piyakisogok niyan pen ko manga Israil.

25 So isa a kapitan ko manga sondaro niyan si Pikahtiyas a wata i Rimaliyas na pikedyatan iyan sa marata si Pikahtiyas. Miyakaonot sekaniyan sa lima polo kataw a taga Giliyad na biyono iyan si Pikahtiyas a rakes i Argob ago si Ariyas sii ko kota ko torogan o dato roo sa Samariya. Na si Pikahtiyas i miyakasambi on a dato.

26 So ped a miyanga sosowasowa ko kandadato i Pikahtiyas ago so langon a pinggolaola niyan na misosorat ko 'Ribro a Totolan ko manga Dato sa Israil.'

Si Pikahtiyas a Dato sa Israil

27 Sii ko ikalima polo ago dowang ragon a kandadato i Osiyas sa Yodah na si Pikahtiyas a wata i Rimaliyas na miyabaloy a dato sa Israil sii sa Samariya na miyakandato sa miyakadowa polo ragon.

28 Miyakanggolaola sekaniyan sa marata ko kapekeilaya on o Allah. Da niyan talikodi so manga dosa i Yarobowam a wata i Nibat a piyakisogok iyan pen ko manga Israil.

29 Sii ko kandadato i Pikahtiyas sa Israil na si Tiglat Pilisir a dato sa Asiriya na somiyondol sa Israil na miyaagaw niyan so manga siti a Iyon, Abil Bit Maakah, Yanoah, Kidis ago Hasor. Miyaagaw niyan pen so manga inged a Giliyad, Galili ago giya Naptali, na biniyag iyan so manga taw na initaog iyan siran roo sa Asiriya.

30 Na si Hosiya a wata i Ilah na pikedyatan iyan sa marata si Pikahtiyas na biyono iyan ago siyambian iyan a dato sii ko ikadowa polo ragon a kandadato i Yotam a wata i Osiyas.

31 So ped a miyanga sosowasowa ko kandadato i Pikah ago so langon a pinggolaola niyan na palaya den misosorat ko 'Ribro a Totolan ko manga Dato sa Israil.'

Si Yotam a Dato sa Yodah

32 Sii ko ikadowa ragon a kandadato i Pikah a wata i Rimaliyas sa Israil na si Yotam a wata i Osiyas na miyadato sa Yodah.

33 Miyakadowa polo ago lima ragon a idad iyan ko kiyandato iyan na miyakandato sa miyakasapolo ago nem ragon sii sa Yarosalim. Aya ngaran o ina iyan na si Yarosa a wata i Sadok.

34 Miyakanggolaola sekaniyan sa ontol ko kapekeilaya on Allah a datar o ama iyan a Osiyas.

35 Ogaid na da mabinasa so manga aparang ko manga barahala sii ko manga bobongan na itataros den o manga taw so di iran on dii kakorban ago kapetotong on sa doka. Si Yotam i miyangon peroman sa Kaporoan a Gimowa o Timplo o Allah.

36 Na so ped a miyanga sosowasowa ko kandadato i Yotam ago so langon a pinggolaola niyan na palaya misosorat ko 'Ribro a Totolan ko manga Dato sa Yodah.'

37 Giyangkoto a masa na aya paganay a kiyasogoa o Allah ki Risin a dato sa Siriya ago si Pikah a dato sa Israil sa kanggobata iran sa Yodah.

38 Na miyatay si Yotam na inilebeng ko pekoboran ko manga dato sii ko siti o Daod a apo iyan, na si Ahas a wata iyan i miyakasambi on a dato.

2 MANGA DATO 16

Si Ahas a Dato sa Yodah

Sii ko ikasapolo ago pito ragon a kandadato i Pikah a wata i Rimaliyas sa Israil na si Ahas a wata i Yotam na miyadato sa Yodah.

2 Dowang polo ragon a idad iyan ko kiyapoon iyan ndato na miyakandato sa miyakasapolo ago nem ragon roo sa Yarosalim. Da niyan sowaa so okitokit o apo iyan a Daod ka da niyan nggolaolaa so ontol ko kapekeilaya on o Allah.

3 Siyoson iyan baden so okitokit o manga dato sa Israil ka apiya so wata iyan a mama na inisoasoat iyan a petotongen ko apoy a aya niyan kiyasongkada ko piyakasingay a paparangayan o ped a manga nasiyon a biyogaw o Allah ko kapesorongi kiran o manga Israil.

4 Di sekaniyan dii korban ago petotong sa doka roo ko manga aparang ko manga barahala sii ko manga poporo a darpa ago sii ko manga bobongan ago sii ko atag oman i marimpoong a kayo.

5 Si Risin a dato sa Siriya ago si Pikah a dato sa Israil na somiyong sa Yarosalim sa kapakipetidawa iran ki Ahas. Na linikopan iran a Yarosalim ogaid na di iran kedaag si Ahas.

6 Sa masa oto na so dato sa Idomiya na miyasakop iyan bo a siti a Ilat na biyogaw niyan so manga taga Yodah a kibabaling roo. Na miyaling roo so manga Idomiyan na ron den mababaling taman imanto.

7 Na somiyogo si Ahas roo ki Tiglat Pilisir a dato sa Asiriya a matero iyan on a "Oripen ako ngka a kambabayaana reka. Song ka sii na sabeta ko ngka ko kapaar o dato sa Siriya ago so dato sa Israil a gomiyobat raken."

8 Na kinowa i Ahas so manga pirak ago manga bolawan a matatago ko Timplo o Allah ago sii ko petegoan sa tamok ko torogan o dato na piyakiwit iyan ai a pamemegayan ko dato sa Asiriya.

9 Na tiyoman ai o dato sa Asiriya ka giyobat iyan a Damasko na miyaagaw niyan. Biniyag iyan so manga taw ron na initaog iyan siran roo sa Kir na biyono iyan pen so dato Risin.

10 Mandiyadi na somiyong so dato Ahas roo sa Damasko sa kipegilayaan iyan ki Tiglat Pilisir a dato sa Asiriya. Roo sa Damasko na miyakailay si Ahas sa aparana na miyakawit sekaniyan ki Oriyas a imam sa ladiyawan ko aparana a rakes o osayan ko kapagambaali ron.

11 Na mimbaal si Oriyas sa aparana a inisayan ko ladiyawan a inipakawit on o dato Ahas a poon sa Damasko, na inimasad iyan ai sa di pen kapekakasoy o dato Ahas.

12 Na sii ko kiyapakabaling o dato a poon sa Damasko na inilay niyan so aparana na somiyapaat sekaniyan on

13 Sa manga korban ago manga pangenengken a petotongen, miyodod on sa soasoat a panginginomen na inipirik iyan on so rogo o pikorban iyan pantag bo ko kanggiginawai.

14 Na kinowa i Ahas so tombaga a aparana a makatitindog ko penggaka o Timplo o Allah sii ko pageletan o bago a aparana ago so Timplo na inibetad iyan sa tampar sa pagotaraan o bago a aparana.

15 Mandiyadi na inisogo iyan ki Oriyas a imam a "Osara ngka so bago a aparana ko kapetotonga ngka ko manga korban igira a kapipita ago so kipesepaaten ko pangenengken igira a kegabigabi ago so pen so kipesepaaten ko petotongen a korban o dato ago so manga pangenengken iyan ago so pen so petotongen a korban o langon a taw ko inged a rakes o manga pangenengken iran ago panginginomen. Na piriken ka sangkai a aparana so langon a rogo o manga ayam a ipesepaat on a petotongen ago dii korbanen. Ogaid na senggain ka raken so aparana a tombaga a maosar aken ko kaperimar."

16 Na ininggolalan i Oriyas so langon a inisogo o dato Ahas.

17 Piyanongkas o dato Ahas so mapepagalin a manga batoga na kinowa niyan on so manga palanggana. Na kinowa niyan on so maolad a tangela sa ig a pepangonaban ko pembatogan on a manga likod o manga mama sapi a tombaga na inibetad iyan ko manga ator.

18 Kinowa niyan pen so sayap a miyabangon ko lamalama o Timplo o Allah a pegosaren ko Gawii a Idedeke, na inolen iyan so gimowa o Timplo a isesenggay ko dato kaan misoasoat ko dato sa Asiriya.

19 Na so ped a miyanga sosowasowa ko kandadato i Ahas ago so miyanggolaola niyan na misosorat ko 'Ribro a Totolan ko manga Dato sa Yodah.'

20 Miyatay si Ahas na inilebeng ko pekoboran ko manga apo iyan sii ko siti o Daod, na si Hisikiyas a wata iyan i miyakasambi on a dato.

2 MANGA DATO 17

Si Hosiya a so Moripori a Dato sa Israil

Sii ko ikasapolo ago dow a ragon a kandadato i Ahas sa Yodah na si Hosiya a wata i Ilah na miyadato sa Israil, na miyakandato sa miyakasiyaw ragon sii sa Samariya.

2 Miyakanggolaola sekaniyan sa marata ko kapekeilaya on o Allah ogaid na kena a ba datar o manga dato sa Israil a miyanga oonaan iyan.

3 Si Salmanisir a dato sa Asiriya na giyobat iyan si Hosiya na miyoral on si Hosiya ago pembayad on sa bowis sa oman ragon.

4 Ogaid na miyakaisa a ragon na tinipo i Hosiya so dato sa Asiriya ka somiyogo sekaniyan sa manga taw ki So a dato sa Misir a miyakitabang on na gominek mayad sa bowis ko dato sa Asiriya a di niyan dii minggolalan ko oman ragon. Sabap roo na piyakidakep sekaniyan i Salmanisir na piyakikalaboso niyan.

5 Mandiyadi na siyondolan i Salmanisir a dalem a Israil na linikopan iyan a Samariya. Sii ko ikatelo ragon a kalilikopi niyan on,

6 A so ikasiyaw ragon ko kandadato i Hosiya, na miyaagaw a Samariya o dato sa Asiriya na biniyag iyan so manga Israil ago initaog iran siran roo sa Asiriya. Na piyakabaling iyan siran sii sa Halah, sii ko inged a Gosan a marani ko Lawasaig a Habor, ago sii ko manga siti sa Midiya.

Miyamangitaog so manga Israil sabap ko Dosa

7 Langon ai miyanggolaola sabap ko kiyapakandosa o manga Israil ko Allah a Tohan iran a aya kiran miyakaliyo sa inged a Misir a ron siran piyangongoripen o Piraon a dato sa Misir. Sominimba siran sa ped a manga katohanan

8 Na siyoson iran so manga adat o manga nasiyon a piyamogaw o Allah sii ko kapesorongi kiran o manga Israil, ago siyowa iran so manga olaola o manga dato sa Israil.

9 Miyakanggolaola pen so manga Israil sa manga pageemaan a minisopak iran ko Allah a Tohan iran. Mimbaal siran sa manga aparan ko manga barahala sii ko manga bobongan sii ko langon a inged iran a mala maito.

10 Na piyamakatindengan iran sa babarakaten kon a manga polaos a ator ago manga polaos a toos ko katohanan a Asirah so oman i maporo a bobongan ago sii ko atag o oman i marimpoong a kayo.

11 Petotong siran sa doka ko oman i aparan ko barahala a lagid o dii nggolaolaan o manga nasiyon a piyamogaw o Allah ko kapepekaantap iran on. Piyakakerangit iran so Allah ko langon a marata a pinggolaola iran.

12 Sominimba siran sa manga barahala apiya pen miyatero kiran o Allah a "Di niyo anan penggolaolaa!"

13 Omanoman pesogoon o Allah so manga nabi niyan ago manga pepekaalamat a piyakaiktiyar iran so manga taw sa Israil ago giya Yodah: "Panalikodi niyo so manga rarata a olaola niyo. Tomana niyo so manga sogoan aken ago manga kokoman a madadalem ko langon o kitab a inisogo aken ko manga apo iyo a initoron aken rekano a nggolalan ko manga oripen aken a manga nabi."

14 Ogaid na da iran ai paratiyayaa ka manga tetegas siran i olo a lagid o manga apo iran a

da sarig ko Allah a Tohan iran.

15 Inisili iran so manga sogoan iyan ago so kapasadan a pimbaalan iyan mipantag ko manga apo iran na da iran pakinega so kiyapakapagiktiyara niyan kiran. Somnimba siran sa da a bali niyan a manga barahala na giya den a ginawa iran i miyabaloy a da a bali niyan. Iniringan iran so manga nasiyon a mbabalibeta kiran ba di inisogo kiran o Allah a "O ba niyo sowaa so di iran dii nggolaolaan!" na pinggolaola iran so inisapar kiran o Allah.

16 Siyogok iran so langon a sogoan o Allah a Tohan iran na inimbaal iran a ginawa iran sa dow a timan a tiyowang a barahala a inisayan sa manga nati a sapi. Mimbaal siran pen sa barahala a katohanan a Asirah, na pesodiyodan iran so langon a kaaden sa langit ago pesimbaan iran so katohanan a Baal.

17 Di iran dii soasoat so manga wata iran a manga mama ago manga babay a petotongen ko apoy. Di iran dii nggolaolaan so kaperimar ago kapangatao na di iran dii pesaan a ginawa iran ko kanggolaola sa marata ko kamamasai ron o Allah a aya iran on kiyapakakerangita.

18 Na sabap ko tanto a kapekerarangiti o Allah ko manga Israil na piyakaawa iyan siran a poon ko kamamasaan iyan, na so bo so mbatabataa Yodah i miyalamba.

19 Ogaid na apiya so manga taw sa Yodah na da iran tomana so manga sogoan o Allah a Tohan iran ka siyoson iran so manga okitokit a mininggolalan o manga Israil.

20 Sabap roo na tiyalikodan o Allah so langon o manga Israil na siniksa iyan siran a piyalad iyan siran ko manga di kiran dii nggogobat taman sa minibowang iyan siran ko a poon ko kamamasaan iyan.

21 Isako kakaan o Allah a Israil a poon ko kandadatoi ron o manga mbawataan o Daod na biyaloy o manga Israil si Yarobowam a wata i Nibat a dato iran. Inagak siran i Yarobowam sa kaawai ran ko kapegonoti ran ko Allah, na piyakandosa niyan siran sa mala a dosa.

22 Na itataros den o manga Israil somowa so langon a manga dosa i Yarobowam a da iran den ai geneki

23 A iniarong ko kiyapakaawaa kiran o Allah a poon ko kamamasaan iyan a giyoto so inipakaiktiyar iyan kiran a nggolalan ko langon a manga oripen iyan a manga nabi. Na miyaakar so manga Israil a poon ko inged iran a miyamangitaog roo sa Asiriya, na ndodoo siran den.

Kiyabalingan bo a Samariya

24 So dato sa Asiriya na miyakawit sa manga taw a poon ko manga siti sa Babilon, Kotah, Aba, Hamat ago giya Siparbaim na piyakapaginged iyan siran sii ko manga siti sa Samariya a minisambi ko manga Israil. Na miyatangan iran a inged a Samariya na biyalingan iran roo so manga siti.

25 Ogaid na sii ko kiyapoon iran roo maling na da siran simba ko Allah. Sabap roo na inowitan iyan siran sa manga arimaw a miyakapatay ko ped ko manga taw.

26 Miyapanotol ko dato sa Asiriya a "So manga taw a piyakapaginged ka ko manga siti sa Samariya na di iran katawan o andamanaya i kasimbaa ko tohan a inged oto. Na

somiyogo sekaniyan sa manga arimaw a pepekatay kiran, ka di iran katawan o antonaa i ipapaliyogat iyan."

27 Na giyoto a inisogo o dato sa Asiriya a "So isa ko manga imam a miyabiyag a poon sa Samariya na pakakasoya niyo ron maling kaan iyan mipangendao ko manga taw so ipapaliyogat o tohan o inged."

28 Mandiyadi na so isa ko manga imam a minitaog a poon sa Samariya na komiyasoy roo a miyaling sa Bitil na piyangendao niyan siran ko kasimbaa ko Allah.

29 Apiya pen oto na so oman i bangsa sii kiran na itataros iran somimba so rek iran a manga katohanan sii ko oman i siti a babalingan iran. Pepakatindegen iran so manga barahala iran sii ko manga darpa a pesimbaan a inembaalan o manga Israil sii ko manga bobongan.

30 So manga taw a poon sa Babilon na miyangembaal sa barahala o Sokot Binot, so manga taw a poon sa Kotah na miyangembaal sa Nirgal, so manga taga Hamat na miyangembaal sa Asima,

31 So manga taga Abit na miyangembaal sa Nibhas ago Tartak, na so manga Siparbitiyo na di iran dii soasoat so manga wata iran a petotongen ko apoy sii ko manga katohanan iran a Adramilik ago Anamilik.

32 Pesimbaan iran mambo so Allah ogaid na ipetoro iran so pitibarangan a manga taw iran a makapegimam ko manga aparang ko manga barahala sii ko manga bobongan a roo iran siran pepakasapaata sa manga soasoat.

33 Apiya iran pesimbaan so Allah na pepangongonotanan iran pen so manga katohanan iran ko manga okitokit o manga nasiyon a kiyapoonan iran.

34 Taman imanto na idadayon iran den so manga andang a adat iran. Kena a ba tito a kapesimbaa iran ko Allah aya pen o ba iran petomanen so manga taritib, manga kokoman, manga kitab ago manga sogoan a inibegay o Allah ko kiyababadan ko Yakob a bitowan iyan sa Israil.

35 Sii ko kiyambaal o Allah sa kapasadan mipantag ko manga Israil na inisogo iyan kiran a "Di kano simba sa ped a manga tohan o di na sodiyod kiran o di na penalagad on aya pen o ba kano ron pekorban.

36 Ka so bo so Allah i simbaa niyo a aya rekano miyakaliyo sa Misir ko kala iyan i kapaar ago kabatowa. Sekaniyan i sodiyodi niyo ago korbani.

37 Lalayon kano pagiiktiyar tomoman ko manga taritib, manga kokoman, manga kitab ago manga sogoan a inisorat aken rekano. Di kano simba sa ped a manga tohan.

38 Di niyo pekalipati so kapasadan a inembaalan aken rekano aya pen o ba kano simba sa ped a manga tohan.

39 Ka aya niyo simbaa na so Allah a Tohan iyo ka sekaniyan i pekasabet rekano ko kapaar o langon a manga ridoay niyo."

40 Ogaid na da iran ai pakinega ka ipeteros iran den so andang a paparangayan iran.

41 Apiya pen pesimbaan angkai a manga taw so Allah na pesimbaan iran pen so manga barahala iran, na taman imanto na so manga moriyataw iran na peteros nggolaola sa datar oto.

2 MANGA DATO 18

Si Hisikiyas a Dato sa Yodah

Sii ko ikatelo ragon a kandadato i Hosiya a wata i Ilah sii sa Israil na si Hisikiyas a wata i Ahas na miyabaloy a dato sa Yodah.

2 Miyakadowa polo ago lima ragon a idad iyan isako poon ndato na miyakandato sa miyakadowa polo ago siyaw ragon sii sa Yarosalim. Na aya ngaran o ina iyan na si Abihah a wata i Sakariyas.

3 Miyakanggolaola sekaniyan sa ontol ko kapekeilaya on o Allah a datar o apo iyan a Daod.

4 Piyaminasa niyan so manga aparan ko manga barahala sii ko manga bobongan, na piroropet iyan so babarakaten kon a manga ator ago piyamata iyan so manga polaos a toos ko katohanan a Asirah. Siyasa iyan pen so tombaga a nipay a pimbaalan o Mosa, ka taman den sangkoto a gawii na pepamanotong on so manga Israil sa doka a ipeselasela on. (Bebetowan so nipay sa 'Nihostan.')

5 Sasarigan i Hisikiyas so Allah a Tohan o Israil. Da den a ba niyan datar ko kalangolongan a manga dato sa Yodah apiya anda ko miyanga oonaan iyan ago so miyanga ooriyan iyan.

6 Papanagontaman sekaniyan ko Allah na da den silay ko kapegonoti niyan on ka petomanen iyan piyapiya so manga sogoan a inibegay o Allah ko Mosa.

7 Sisii rekaniyan so Allah na tetagompiya sekaniyan ko apiya antonaa i di niyan dii nggolaolaan. Siyopak iyan so dato sa Asiriya na da sekaniyan on pakimbayabaya.

8 Tiyaban iyan so manga Pilistiyo sii ko pagiingedan iran taman den sa Gasa ago so manga sakop iyan a apiya anda ko lebi on a maito a siti ago so mala a kokotaan.

9 Sii ko ikapat ragon a kandadato i Hisikiyas a giyoto so ikapito ragon a kandadato i Hosiya sa Israil na si Salmanisir a dato sa Asiriya na siyondolan iyan a Samariya na linikopan iyan.

10 Sii ko kaposan o ikatelo ragon a kalilikopi ron na miyataban ai o manga taw sa Asiriya. Miyaagaw a Samariya sii ko ikanem ragon a kandadato i Hisikiyas a giyoto so ikasiyaw ragon a kandadato i Hosiya sa Israil.

11 So dato sa Asiriya na initaog iyan so manga Israil na piyakapaginged iyan siran roo sa Halah, sii sa Gosan a marani ko Lawasaig a Habor ago sii ko manga siti sa Midiya.

12 Miyanggolaola ini sabap sa da iran paratipayaa so Allah a Tohan iran, ka siyogok iran so kapasadan iyan, a so langon a sogoan a inibegay o Allah a nggolalan ko oripen iyan a Mosa. Da iran den ai pakinega aya pen o ba iran tiyoman.

Siyondolan o manga taw sa Asiriya a Yodah

13 Sii ko ikasapolo ago pat ragon a kandadato i Hisikiyas na si Sinakarib a dato sa Asiriya na giyobat iyan langon so kikokotaan a siti sa Yodah na miyanga agaw niyan.

14 Sabap roo na piyakiwit o dato Hisikiyas angkai a lalag ki Sinakarib roo sa Lakis a tig iyan a "Miyakanggolaola ko sa ribat. Awai ako ngka ka mbayadan ko seka sa apiya antonaa i kabaya a ka raken." Na aya inipanton on o dato sa Asiriya na sapolo nggibo ka kilo a pirak ago sanggibo ka kilo a bolawan.

15 Sabap roo na inibegay rekaniyan i Hisikiyas so langowan a pirak a matatago ko

Timplo o Allah ago sii ko petegoan sa tamok ko torogan o dato.

16 Na piyangaka iyan pen so bolawan ko manga pintoan o Timplo o Allah na pilelekat iyan so bolawan a inilapis iyan ko manga tokod o manga pintoan na piyakiwit iyan langon ko dato sa Asiriya.

17 Apiya pen oto na somiyogo so dato sa Asiriya sa madakel a sondaro a poon sa Lakis sa kasong iran ki Hisikiyas roo sa Yarosalim a pagoolowanan siran o telo kataw a manga poporo a komandir iyan. Kagiya makaoma siran sa Yarosalim na tomiyareg siran ko obay o lalan a ipesong sa pangomaan a pepamamipian a marani ko kakar a ipegokit o ig a poon ko mipoporo a pepondowan on.

18 Tiyawag iran so dato na lominiyo kiran si Iliyakim a wata i Hilkiyas a so tetandingan ko torogan, si Sibna a panonorat ago si Yowas a wata i Asap a aya komikibir ko manga rikord.

19 Na pitero kiran o isa ko manga komandir a "Teroa niyo ki Hisikiyas angkai a kabasa o kababantogan a dato sa Asiriya:

Antonaa i pepasodan ka sangkai a kasasana ngka?

20 Aya pitero o ka na aden a kapasang ka ago kabager sa katidawa, ogaid na da a benar on. Anta i sasarigan ka a siyorang ako ngka?

21 Ilaya ngka man ka giya Misir a sasarigan ka na lagid o maoopak a teken a pekabowar ago pekapali sa lima o taw a ndeken on. So Piraon a dato sa Misir na lagid anan ko langon a somasarig on.

22 "Na o peteroa niyo raken a 'Aya sasarigan ami na so Allah a Tohan ami!' na ba di sekaniyan i kirek ko manga aparang a pinggegeba i Hisikiyas sii ko manga bobongan a tig iyan a "Sii kano bo pekasimba sangkai a aparang sa Yarosalim?"

23 Tig pen o komandir a

"Na den, makipepesadanowai rekano so kadnan aken a dato sa Asiriya. Mbegan kano niyan sa dowanggibo a koda o aden a ketoon iyo a manga sondaro a mapakakoda iyo ron!

24 Andamanaya den i kapekaato niyo ko apiya isa bo ko lebi a manga bababa a kapitan o manga sondaro o kadnan aken bapiya pen aya niyo sasarigan na Misir sa kabegi niyan rekano sa manga karo ago manga pangongoda?

25 Liyo san pen na ba aya katawi ngka on na miyakaoma ko sii a nggobat ago mbinasa sangkai a darpa a ba da sogoon o Allah? Kena, ka so den so Allah i somiyogo raken sa kanggobata ago kambinasaa ko ron."

26 Mandiyadi na si Iliyakim a wata i Hilkiyas, si Sibna ago si Yowas na pitero iran ko komandir a "Kapedipedi ka bo na mbityarain kami ngka a manga oripen ka sa basa Aramaik ka kesabotan ami. Di ngka rekami pakipembityarai sa basa a Hibriyo ko kapekenega on o manga taw ko pangeleban o siti."

27 Ogaid na tig o komandir a "Ba aya katao niyo ron a so bo so dato iyo ago sekano i

siyogoan raken o kadnan aken sa kapeteroa ko sii? Kena, ka so pen so manga taw a kioontod ko pangeleban a datar iyo a pekakan ko tai iran ago pekainom ko titi iran!"

28 Na giyoto a tominideg so komandir na miyananalo sa matanog sa basa a Hibriyo a "Pamakinega niyo so kabasa o kababantogan a dato, a so dato sa Asiriya!

29 Aya pitero iyan na: Di kano pekiakal ki Hisikiyas. Di kano niyan pekalidasen ko kapaar aken.

30 Di kano pekiakol ki Hisikiyas sa kaserigi niyo ko Allah ko kapeteroa niyan a 'Matamataan a sebeten tano o Allah na giyangkai a siti na di den kepalad ko dato sa Asiriya.'

31 "Di niyo pekinega si Hisikiyas! Giyai i pitero o dato sa Asiriya: Liyo kano ko siti na oral kano raken, ka so oman i isa rekano na pekataros koman ko onga o waged iyan ago kayo a higos ago pekainom pen sa ig ko paridi iyan

32 Taman sa makaoma ako sa kapagowita ko rekano ko inged a lagid angkai a inged iyo, a so inged a oodaren sa pereperan ago bago a arak, a madakel a pangenengken on, manga asinda a obas ago manga kayo a olibi, a so kateneban a inged. Pilia niyo so kaoyagoyag a kena o ba so kapatay! Di niyo pekinega si Hisikiyas ka pendadagen kano niyan ko kiyateroa niyan on a 'Sebeten tano o Allah!'

33 Ba aden a tohan o apiya anda a nasiyon a ba niyan piyakalidas so inged iyan ko tangan o dato sa Asiriya?

34 Anda so manga tohan sa siti a Hamat ago giya Arpad? Anda so manga tohan sa Siparbaim, Hina ago giya Ibah? Ba iran miyapakalidas a Samariya ko lima ko?

35 Antawaa ko kalangolangan a manga tohan sangkai a manga nasiyon i ba niyan raken miyasabet so inged iyan? Na andamanaya den i kapakalidasa o Allah sa Yarosalim ko kapaar aken?"

36 Ogaid na baden rerenek so manga taw a da a inisembag iran on ka kagiya inisogo o dato a "Di niyo sembaga."

37 Mandiyadi na si Iliyakim a tetandingan ko torogan, si Sibna a panonorat ago si Yowas a komikibir ko manga rikord na kinisi iran so manga nditaren iran sa kamboboko na miyamanong ki Hisikiyas a piyanotol iran on so pitero o komandir.

2 MANGA DATO 19

Miyangni so Dato sa Mosawir

So kiyanega sii o dato Hisikiyas na kinisi iyan so manga nditaren iyan na minditar sa sako, na somiyong ko Timplo o Allah.

2 Na siyogo iyan si kiki Iliyakim a so tetandingan ko torogan, si Sibna a panonorat ago so manga olowan a manga imam a palaya kindiditar sa sako sa kasong iran ko nabi Isayas a wata i Amos.

3 Pitero iran on angkai a kabasa i Hisikiyas: "Giyangkai a gawii na gawii a kamaregenan. Pesiksaan tano ago pekowaan a diyaman a lagid igira a pekilotad so wata a da a bager o ina iyan sa kipemberoten iyan on.

4 Masiken a pemakinegen o Allah a Tohan ka so langon a katero o komandir a siyogo o kadnan iyan a dato sa Asiriya sa kapemagongatongata niyan ko oyagoyag a Tohan.

Pangnin ta a masiksa sekaniyan o Allah a Tohan ka sabap sangkai a manga katero a miyaneg iyan. Na, pangangarapanen ka so lamba a manga taw a miyakapamagoyag."

5 So kiyawita o manga siyogo o dato Hisikiyas sangkai a lalag iyan ki Isayas

6 Na pitero kiran i Isayas a "Teroa niyo ko kadnan iyo a 'Giyai i kabasa o Allah: Di niyo pekeleken so manga katero a miyaneg iyo a minipagitowito raken o manga oripen o dato sa Asiriya.

7 Ilaya ngka man ka peseriat ako a sorang on ka pekineg aken ko dato so total a kesabapan ko kakesoy niyan ko inged iyan, na roo aken pekibono a pedang.' "

8 So peman so komandir a poon sa Asiriya na kiyatokawan iyan a inawaan o dato sa Asiriya a siti a Lakis ka dii makitidawa ko manga taw sa Libnah. Sabap roo na somiyong on so komandir a makpemosawir on.

9 Samanaya na miniripot ki Sinakarib a dato sa Asiriya a si Tirhakah a taga Kos a so dato sa Misir na pepekaantap rekaniyan a magoolowan ko manga sondaro sa kapakipetidawa iran on. Kagiya maneg ai i Sinakarib na miyakawit sekaniyan peman sa lalag ki Hisikiyas a dato sa Yodah a tig iyan a

10 "Di ka pekiakal ko tohan a sasaringan ka ko kiyateroa niyan on reka a 'Giya Yarosalim na di kepalad ko dato sa Asiriya.'

11 Katawan ko a miyaneg ka so inikidia o manga dato sa Asiriya ko langon a inged a piyaminasa iran sa tarotop. Na kilidas ka bes?

12 Ba miyakalidas o manga tohan iran so manga nasiyon a miyabinasa o manga apo aken, a so manga tohan sa Gosan, Haran, Risip ago so manga taw sa Idin a kibabaling sa Tilasar?

13 Anda den so dato sa Hamat, so dato sa Arpad ago so manga dato sa siti a Siparbaim ago Hina ago giya Ibah?"

So Pangangarapan i Hisikiyas

14 Miyadawat i Hisikiyas so sorat a poon ko manga siyogo na biyatiya iyan. Mandiyadi na somiyong sekaniyan ko Timplo o Allah na kiyayat iyan so sorat ko kamamasaan o Allah.

15 Na miyangangarapan si Hisikiyas ko Allah a tig iyan a "Ya Allah a Tohan o Israil a kokorsi ko poro o dow a piyagtawtaw a manga malaikat, seka bo i Tohan o kalangolongan a ndatoan ko doniya. Inaden ka so langit ago so lopa.

16 Lekai ngka, ya Allah, so tangila ngka na pakinegen ka; bekara ngka so mata ngka na ilain ka; pamakinega ngka so manga katero a piyakiwit i Sinakarib a inipanongka iyan ko oyagoyag a Tohan!

17 "Benar den, ya Allah, a so manga dato sa Asiriya na miyalaslas iran angkai a manga nasiyon ago so manga kaingedan iran.

18 Inilebad iran so manga tohan iran ko apoy na piyaminasa iran, ka kena ini o ba tito a manga tohan ka matag baden manga barahala a kayo ago ator a piteong o lima o manosiya.

19 Imanto, ya Allah a Tohan ami, na lidasen kami ngka ko kapaar o dato sa Asiriya kaan katokawi o langon a ndatoan ko doniya a seka bo, ya Allah, i Tohan."

Miyaalamat i Isayas so Kakebinasa i Sinakarib

20 Mandiyadi na si Isayas a wata i Amos na miyakawit sa lalag ki Hisikiyas a tig iyan a "Giyai i pitero o Allah a Tohan o Israil: Tiyarima aken so pangni ngka makapantag ki Sinakarib a dato sa Asiriya.

21 Na giyai i pitero o Allah a inisopak rekaniyan:

Giya Siyon, a siti a Yarosalim, na di ka niyan dii sodiin ago di reka dii mangelengkeleng ko kapepalagoy ngka.

22 Antawaa i mapipikir ka a piyagongatongat ka ago piyagitowito?

Antawaa i pipesongan ka ago pitekaboran?

So den so Soti a Tohan o Israil!

23 Miyakanggolalan ko manga siyogo o ka na piyagitowito o ka so Kadnan

na miyatero o ka a 'Rakes o madakel a karo aken

na miyanik ako taman ko poro o manga palaw,

a so lebi a maporo a manga palaw roo sa Libanon.

Miyapata aken so lebi a manga poporo on a kayo a sidro

ago so lebi a manga pipiya on a kayo a kalipapa.

Miyaoma ko so pinakamawatan on a darpa

sii ko lebi a manga pipiya a kalasan on.

24 Miyakakalot ako sa manga paridi sii ko kaingedan o manga rait ago miyakainom ko ig on.

Miyapakamara o palad a ai o manga sondaro aken so langon a lawasaig sa Misir.'

25 "Di ngka bes katawan a miyatey den a inisogo aken ai?

Sii ko andang a manga gawii na miyatekdir aken,

na imanto na mininggolalan aken den,

ka bigan aken seka sa gees sa kiyabaloya ngka ko kikokotaan a manga siti a piyamatiyong a ator.

26 Giyanan i sabap a manga lolobay so manga taw ron a miyanga alek ago miyanga lilibog.

Lagid siran o manga pamomolan ko kalopaan

ago lagid o manga lonaw a malemek a otan,

na lagid mambo o otan a mireretok ko liyawaw o atep

a kelanes ko di niyan pen kapekala.

27 "Ogaid na katawan ko seka piyapiya ago ay kapelalakaw ngka ago kapekesoy,

ago so di ngka raken dii kakerangiti.

28 Na sabap sa minisampay ko tangila ko

so di ngka raken dii kakerangiti ago so katetakabor ka

na sengiten aken so ngirong ka

ago kekangan aken so ngari i ka

na tondaan ko seka komasoy

ko iniokit ka ko kiyasong ka sii."

29 Na pitero i Isayas ki Hisikiyas a "Giyai i toos reka sa so Allah i mitero sii: Sii sangkai a ragon ago so telondog a ragon na aya bo a kekan iyo na so pereperan a mangengeto a da niyo pamolaa. Ogaid na sii ko ikatelo ragon na pekasaod kano ago makaperagon.

Pekapamola kano sa manga waged a obas na pekakan kano ko manga onga niyan.

30 Na so lamba ko manga taw sa Yodah a makapemagoyag na pembekaw peroman sa madalem ago pemangonga sii sa poro.

31 Ka aden a kelamba a manga taw a makapegoyag a pekapoon sa Yarosalim ago so Palaw a Siyon. So kasigi o Allah a Lebi a Mamaapaar na aya sii penggolalan.

32 "Giyai i kabasa o Allah makapantag ko dato sa Asiriya: Di sekaniyan pekasoled sangkai a siti aya pen o ba sii makapana sa apiya isa bo a gasa. Di ron pekarani so manga sondaro niyan a ba kekelong aya pen o ba iran kalikopi sa manga tambak.

33 Sii ko lalan a iniokit iyan ko kiyasong iyan sii na aya niyan bo kikasoy; di sekaniyan pekasoled sangkai a siti" a tig o Allah

34 "ka pelindingen ko angkai a siti ago sebeten ko sabap ko bantogan aken ago sabap ko Daod a oripen aken."

35 Sa kagagawii oto na somiyong so malaikat o Allah ko kampo o manga sondaro a Asiriya na piyamoto iyan roo so magatos ago walo polo ago lima nggibo a manga mama. Na sii ko kiyapagnaw o manga taw ko kapipita na roo makakekelit so langon a miyamatay a manga badan.

36 Na giyoto a inawaan i Sinakarib a dato sa Asiriya so kampo na komiyasoy sa Ninibah a roo komiyaden.

37 Miyakaisa alongan sii ko kapesimba niyan sii ko pesimbaan ko tohan iyan a Nisrok na so manga wata iyan a si Adramilik ago si Sarisir na biyono iran sekaniyan a pedang na miyamagapas siran sa inged a Ararat. Na so isa a wata iyan a si Isarhadan na aya on miyakasambi a dato.

2 MANGA DATO 20

So Sakit i Hisikiyas

Sangkoto a manga gawii na miyasakit si Hisikiyas a piyakapapatay. Somiyong on so nabi Isayas a wata i Amos a tig iyan a "Giyai i pitero o Allah: Tanora ngka so langon taman ka petay ka; di ka pekabager."

2 Na inidingil i Hisikiyas a paras iyan ko keleb na miyangangarapan ko Allah a

3 "Ya Allah, tanodi ngka so kiyapaginetaw aken a mapaparatiyaya reka ago iklas ko poso aken a kambabayorantang reka a miyakanggolaola ko sa ontol ko kapekeilaya ngka on." Na miyakasegad sebenar si Hisikiyas.

4 Sii ko da pen kaganati i Isayas ko lamalama o torogan na minitoron on so katero o Allah a tig iyan a

5 "Kasoy ka ki Hisikiyas a so dato o manga pagtaw aken na teroa ngka on a 'Giyai i pitero o Allah a Tohan o apo ka a Daod: Miyaneg aken so pangni ngka ago miyailay aken so manga lo ka na mbolongan ko seka. Sii ko ikatelo gawii ipoon imanto na pekasang ka

ko Timplo o Allah.

6 Pagomanan ko sa sapolo ago lima ragon so omor ka na ipelidas aken seka ago giyangkai a siti ko kapaar o dato sa Asiriya.' "

7 Na tig i Isayas a "Tiyagar kano sa tompi a manga higos na depilen iyo ko lebag iyan ka pekapiya sekaniyan." Pinggolaola iran ai na miyakapiya.

8 Sa da pen ai minggolalan na iniise i Hisikiyas ki Isayas a "Antonaa i toos a pekapiyaan ako o Allah ago pekasong ako ko Timplo o Allah amay ka makatelo den gawii?"

9 Inisembag i Isayas a "Giyai i toos a imbegay reka o Allah sa kitomanen iyan ko minitopa niyan. Antonaa i kabaya a ka? Ba pekaonaa so along o alongan sa sapolo kerit o di na pakapengendoden sa sapolo kerit?"

10 Tig i Hisikiyas a "Malebod so kapepakaona o along sa sapolo kerit. Pakipangendoden ka bo sa sapolo kerit."

11 Na miyangni so nabi Isayas ko Allah na piyakapangendod o Allah so along sa sapolo kerit a miniona niyan den sii ko towak i Ahas.

So manga Sogo a poon sa Babilon

12 Sa masa oto na so dato sa Babilon a si Mirodak Baladan a wata i Baladan na miyakawit ki Hisikiyas sa sorat ago pamemegayan ka miyaneg iyan a pekesakit si Hisikiyas.

13 Tiyarima i Hisikiyas so manga siyogo a poon sa Babilon na piyakiilay niyan kiran so langon taman a matatago ko manga petegoan iyan sa tamok, a so manga pirak, manga bolawan, manga palapa, manga pipiya a lana, so manga kasangkapan sa katidawa ago so langon a ped a patemotamokan iyan. Da den a manga nganin sii ko torogan iyan o di na sii ko dalem a ndatoan iyan a ba da kiran pakiilain i Hisikiyas.

14 Oriyan iyan na somiyong so nabi Isayas ko dato Hisikiyas na iniise iyan a "Antonaa i pitero angkoto a manga mama ago anda siran poon?"

"Poon ko mawatan a inged," a inisembag i Hisikiyas. "Poon siran sa Babilon."

15 Na tig o nabi a "Antonaa i miyailay iran ko torogan ka?"

"Miyailay iran so langon taman ko torogan aken," a tig i Hisikiyas. "Da den a ba ko kiran da pakiilain ko manga kakawasaan aken."

16 Mandiyadi na pitero i Isayas ki Hisikiyas a "Pakinega ngka so katero o Allah:

17 Mataan a pekatalingoma so masa a so langon taman ko torogan ka a rakes o langon a miyatimo o manga apo o ka taman sangkai a gawii na keawidan roo sa Babilon. Da den a ba on kelamba, a tig o Allah.

18 Na so ped ko manga moriyataw ngka a so den so rogo o ka na penga bibiyag a pembabaloy a manga orobarang sii ko torogan o dato sa Babilon."

19 "So kabasa o Allah a miyatero o ka na mapiya," a tig i Hisikiyas. Ka aya mapipikir iyan na "Naino, ka maaden pen a kalilintad ago kalilinding sii ko kaoyaoayag aken."

20 Na so ped a miyanga sosowasowa ko kandadato i Hisikiyas ago so langon a miyanga papasad iyan a rakes on so kiyambaal iyan sa pondo a ig ago kakar a pendelegan o ig ko siti na palaya den minisorat ko 'Ribro a Totolan ko manga Dato sa Yodah.'

21 Na miyatay si Hisikiyas na so wata iyan a si Manasih na aya on miyakasambi a dato.

2 MANGA DATO 21

Si Manasih a Dato sa Yodah

Sapolo ago dow a ragon a idad i Manasih ko kiyapoon iyan ndato na miyakandato sa miyakalima polo ago lima ragon sii sa Yarosalim. Aya ngaran o ina iyan na si Hipsibah.

2 Miyakanggolaola sekaniyan sa marata ko kapekeilaya on o Allah a siyongkad iyan so piyakasingay a manga paparangayan o manga nasiyon a piyamogaw o Allah ko kapesorongi kiran o manga Israil.

3 Biyangan iyan peroman so manga aparang ko manga barahala sii ko manga bobongan a piyaminasa i Hisikiyas a ama iyan. Mimbaal sekaniyan pen sa manga aparang ko Baal ago so barahala a katoanan a Asirah a lagid o pinggolaola i Ahab a dato sa Israil. Pesodiyodan iyan langon so manga kaaden sa langit ago pesimbaan iyan.

4 Mimbaal sekaniyan sa manga aparang sii ko Timplo o Allah a so darpa a miyatero o Allah a "Tegoon aken so Ingaran aken sii sa Yarosalim."

5 Na sii ko dow a lamalama o Timplo o Allah na piyakatindagan iyan sa manga aparang a pesimbaan ko manga bitoon.

6 Inisoasoat iyan pen so wata iyan a mama a tiyotong sii ko apoy. Di niyan dii nggolaolaan so kapamantak ago kaperimar na pegodasan iyan so manga pepamangangay ago manga pendarpaan. Tanto a madakel a marata a pinggolaola niyan ko kapekeilaya on o Allah a inikararangit iyan.

7 So barahala a Asirah a pimbaalan iyan na piyakatindag iyan sii ko Timplo o Allah a so darpa a miyatero o Allah ko Daod ago so wata iyan a Solaiman a "Giyangkai a Timplo ago giya Yarosalim i miyapili aken ko langon a inged o manga mbatabataa Israil a ron aken tegoa so Ingaran aken sa taman sa pakataman.

8 Na o piyapiyai tomoman o manga Israil so langon taman a inisogo aken kiran ago inggolalan iran so langon o Kitab a inibegay aken ko Mosa a oripen aken na di aken siran pekitaog a poon ko lopa a inibegay aken ko manga apo iran."

9 Ogaid na da iran ai pakinega na piyakateridadag siran i Manasih sa di iran dii kanggolaola sa lebi pen a marata a di so manga nasiyon a bininasa o Allah ko kiyapakasoled o manga Israil ko inged.

10 Na pitero o Allah a nggolalan ko manga oripen iyan a manga nabi a

11 "Miyasogok i Manasih a dato sa Yodah angkai a piyakasingay a manga dosa. Minggolaola sekaniyan sa lebi pen a marata a di so manga Amoriyo a magiinged gowani sangkai a lopa. Miyapakandosa niyan pen so manga taw sa Yodah a nggolalan ko manga barahala niyan.

12 Kagiya ka maoto na giyai i kabasa o Allah a Tohan o Israil: Pagowitan ko sa morala a

Yarosolim ago giya Yodah a ikebengang o oman i pekaneg on.

13 Isiksa aken sa Yarosalim so inisiksa aken sa Samariya ago so pamiliya i Ahab. Ponasen ko a Yarosalim a lagid o kapeponasi o taw ko pinggan a pelekeben iyan.

14 Telikodan aken so pemakapagoyag a manga pagtaw aken na peladen ko siran ko manga ridoay iran a peges kiran ago peteban.

15 Ka miyanggolaola siran sa marata ko kapekeilaya ko ron na di ako iran dii pakakerangiten ipoon ko gawii a kiyapakaliyo o manga apo iran sa Misir taman sangkai a gawii."

16 Liyo ron pen na piyamoto i Manasih so tanto a madakel a da a manga sala iyan a minipeno so rogo iran sa Yarosalim. Minipagoman ai ko kiyapakandosaa niyan ko manga taw sa Yodah sa kiyanggolaola iran sa marata ko kapekeilaya on o Allah.

17 So ped a miyanga sosowasowa ko kandadato i Manasih ago so langon a miyanggolaola niyan a rakes o kapekedosa niyan na palaya minisorat ko 'Ribro a Totolan ko manga Dato sa Yodah.'

18 Miyatay si Manasih na sii minilebeng ko sapadan sa torogan a so sapadan i Osa. Na si Amon a wata iyan i miyakasambi on a dato.

Si Amon a Dato sa Yodah

19 Dowa polo ago dowa ragon a idad i Amon isako mabaloy a dato na miyakandato sa miyakadowa ragon sii sa Yarosalim. Aya ngaran o ina iyan na si Misolimit a wata i Haros a taga Yotbah.

20 Miyakanggolaola sekaniyan sa marata ko kapekeilaya on o Allah a datar i Manasih a ama iyan.

21 Siyoson iyan so langon a okitokit o ama iyan. Pesodiyodan iyan ago pesimbaan so manga barahala a sinimba o ama iyan.

22 Tiyalikodan iyan so Allah a so Tohan o manga apo iyan na da niyan kedega so lalan o Allah.

23 So manga sanasanaan i Amon na piyagopakatan iran sekaniyan sa marata na biyono iran sii ko walay niyan.

24 Ogaid na so manga taw ko inged na biyono iran so langon a miyagopakat ko dato sa marata na diyato iran si Yosiyas a wata iyan a misambi on.

25 So ped a miyanga sosowasowa ko kandadato i Amon ago so miyanggolaola niyan na palaya misosorat ko 'Ribro a Totolan ko manga Dato sa Yodah.'

26 Minilebeng sekaniyan ko kobor iyan sii ko sapadan i Osa, na si Yosiyas a wata iyan na aya on miyakasambi a dato.

2 MANGA DATO 22

Si Yosiyas a Dato sa Yodah

Miyakawalo ragon a idad i Yosiyas isako mipoon ndato na miyakandato sa miyakatelo ago isa ragon sii sa Yarosalim. Aya ngaran o ina iyan na si Yadidah a wata i Adayas a taga Boskat.

2 Miyakanggolaola sekaniyan sa ontol ko kapekeilaya on o Allah na siyoson iyan so manga okitokit o apo iyan a so Daod na da on den panilasilay sa kawananan o di na sa diwang.

3 Sii ko ikasapolo ago walo ragon ko kandadato i Yosiyas na siyogo iyan so panonorat a si Sapan a wata i Asaliyas, a so wata i Misolam, sa kasong iyan ko Timplo o Allah a tig iyan a

4 "Song ka ki Hilkiyas a maporo a imam na pakipagitongen ka on so pirak a miyapangowit ko Timplo a miyapangowa o manga komikibir ko pintoan a poon ko manga taw.

5 Teroa ngka on a imbegay niyan angkai a pirak ko manga tetandingan ko galebek ko Timplo na isokay iran ai ko kigagalebek a magompiya ko Timplo,

6 A so manga panday sa kayo, so manga penagombalay ago so manga panonominto. Pakapamasaa ngka siran pen sa manga tarakayo ago kiyapanapilan a manga ator a ipegompiya ko Timplo.

7 Ogaid na kena a ba kiran den paliyogat so kipesoraten iran ko kiyasara ko pirak a imbegay kiran ka kasarigan siran.

Miyatoon so Kitab o Allah

8 Na pitero i Hilkiyas a maporo a imam ki Sapan a panonorat a "Miyatoon aken so Ribro a Kitab sii ko Timplo o Allah." Inibegay niyan ai ki Sapan na biyatiya iyan.

9 Mandiyadi na komiyasoy si Sapan a panonorat ko dato na piyakitokawan iyan on so miyanggolaola a tig iyan a "So manga sanasanaan ka na kinowa iran so pirak a miyatimo ko Timplo na inipamegay iran ko manga tetandingan ko kigagalebek on."

10 Na pitero pen i Sapan ko dato a "Si Hilkiyas a imam na bigan ako niyan sa ribro." Na biyatiya ini i Sapan ko kamamasan o dato.

11 So kiyanega o dato ko manga katero ko Ribro a Kitab na kinisi iyan so kimon iyan

12 Na piyandoan iyan si Hilkiyas a imam, si Ahikam a wata i Sapan, si Akbor a wata i Mikayas, si Sapan a panonorat ago si Asayas a so dii manalagad ko dato a tig iyan a

13 "Ikano roo na go niyo isei so Allah para raken ago so langon a taw sa Yodah makapantag ko misosorat sangkai a ribro a miyatoon. Tanto a mala so rarangit o Allah a pesokeyaw rektano ka kagiya da paratiyayaa o manga apo tano so manga katero sangkai a ribro. Da iran nggolalanen so misosorat on a ipapaliyogat rektano."

14 Mandiyadi na si Hilkiyas, si Ahikam, si Akbor, si Sapan ago si Asayas na miyamanong ko nabi a babay a si Holdah a karoma i Salom a wata i Tikbah, a so wata i Harbas, a aya komikibir ko manga kimon sii ko Timplo. Sii sekaniyan mababaling ko miyambago a sabaad sa Yarosalim, na inimbitiyarai ran sekaniyan.

15 Na pitero iyan kiran a "Giyai i kabasa o Allah a Tohan o Israil: Teroa niyo ko mama a somiyogo rekano sii raken a

16 Giyai i pitero o Allah: Pagowitan ko sa morala angkai a siti a Yarosalim ago so manga taw ron a aya kaketoman o langon a misosorat ko ribro a miyabatiya o dato sa Yodah.

17 Tiyalikodan ako iran ago tomiyotong siran sa doka ko salakaw a manga tohan.

Piyakakerangit ako iran a nggolalan ko langon a miyanggolaola iran. So rarangit aken na pesokeyaw sangkai a darpa na di den pekalenggaw.

18 “Ogaid na makapantag ko dato sa Yodah a somiyogo rekano sa kapagisei niyo ko Allah na teroa niyo ron a Giyai i pitero o Allah a Tohan o Israil: Piyamagineg ka so manga katero ko ribro

19 Na miteobat ka ago inipangalimbabaan ka a ginawa ngka ko kamamasaan o Allah na kinisi i ka so kimon ka ago gomiyoraok ko hadapan aken isako maneg ka so miyatero aken makapantag sangkai a darpa ago so manga taw ron a kemorkaan siran ago kelaslas. Sabap roo na inampon aken seka," a tig o Allah,

20 “na itepi aken seka ko manga apo o ka na kilebeng ka a lomilintad. Di ngka keilay so langon a morala a itena aken sangkai a darpa.”

Na komiyasoy so manga mama ko dato na piyanotol iran on ai.

2 MANGA DATO 23

Pimataan i Yosiyas so Kapasadan

Mandiyadi na piyakisogoan o dato so langon a manga olowan sii sa Yodah ago giya Yarosalim

2 Na somiyong siran langon ko Timplo o Allah a oonotan o manga taw sa Yodah ago sa Yarosalim a rakes o manga imam ago so manga nabi, a so langon a taw ipoon ko mababa taman ko maporo. Na biyatiya o dato so langon a manga katero ko Ribro a Kapasadan a miyatoon ko Timplo.

3 Tominideg so dato a miabay ko polaos na inisepa iyan ko hadapan o Allah a peratiyaya sekaniyan ko Allah ago toman ko langon a sogoan iyan, manga taritib iyan ago manga kokoman sa iklas ko poso iyan ago iklas ko niyawa niyan. Giyanan i kinipemataanen iyan ko langon a katero a misosorat ko Ribro a Kapasadan. Na misepa mambo so langon a taw sa kapetomana iran ko kapasadan.

4 Inisogo o dato ki Hilkiyas a maporo a imam, so manga katib ago so manga gordiya ko gimowa a kowaa iran ko Timplo o Allah so langon a kasangkapan a pegosaren ko kapesimbaa ko Baal ago so katohanan a Asirah ago so langon a manga bitoon. Tiyotong iyan ai langon sa liyo a Yarosalim sii ko Balintad a Kidron na piyakiwit iyan so manga ombi roo sa Bitil.

5 Kinowaan iyan sa galebek so langon a pepegimam ko manga barahala a inipamanoro gowani o manga dato sa Yodah sa kapenotong iran sa doka ko manga aparan sii ko manga bobongan ko manga siti sa Yodah ago sii ko manga darpa ko melilibeta sa Yarosalim. Petotong siran sa doka a dii soasoat ko Baal, sii ko alongan, so olan ago so manga bitoon ago so langon a bager o kawang.

6 Kinowa niyan so barahala a Asirah a poon ko Timplo o Allah na inowit iyan ko Balintad a Kidron sa liyo a Yarosalim na tiyotong iyan roo. Na tiyapotapong iyan na iniparak iyan so tapong ko pelebengan ko komakalilid a manga taw.

7 Giba iyan pen so pekedenan o manga mama a dii sondal a sii matatago ko soled o Timplo o Allah a ron dii mangaol so manga babay sa manga rending a para ko barahala a Asirah.

8 Piyakikasoy i Yosiyas sa Yarosalim so langon a imam a kibabaling ko ped a manga siti

sa Yodah na piresikan iyan so manga aparang a piyanotongan iran sa doka ipoon sa Giba na taman sa Birsiba. Pinggegeba iyan pen so manga aparang sii ko isoled ko gimowa a pimbaalan i Yosowa a gobirnadong ko siti a madidiwang o pintoan o siti.

9 Giyangkai a manga imam a miyamanalagad ko manga aparang ko manga barahala na di keparo a kapenalagadi iran ko aparang ko Allah roo sa Yarosalim, ogaid na pepekakan siran ko paan a da a tapay ron a peken o ped iran a manga imam.

10 Piresikan pen i Yosiyas so aparang ko Topit a sii matatago ko Balintad a Bin Hinom kaan da den a ba on pekatotong sa wata iyan a mama o di na babay a soasoat ko katoanan a Molik.

11 Kinowa niyan so inisayan sa manga koda a inisenggay o manga dato sa Yodah ko kapesimba ko alongan na tiyotong iyan so manga karo a inisenggay mambo sangkai a kapesimba. (Matatago ini ko lamalama o Timplo o Allah ko obay o gimowa iyan a marani ko rowang i Natan Milik a maporo a opisiyal.)

12 Pinggegeba o dato so manga aparang a piyangembaalan o manga dato sa Yodah sii ko atep o torogan ko kaporoan o rowang i Ahas, ago so pen so manga aparang a pimbaalan i Manasih ko dowang a lamalama ko Timplo o Allah. Pirorompi niyan ai langon na iniparangk iyan sii ko Balintad a Kidron.

13 Piresikan pen i Yosiyas so manga aparang ko manga barahala a pimbaalan o Solaiman a dato sa Israil sa sebangang a Yarosalim sii sa pagabagatan o Palaw a Olibi a pegosaren ko kapesimba ko Astorit a so piyakasinggay a babay a katoanan o manga taw sa Sidon, ago so Kimos a piyakasinggay a katoanan o manga Mowabiyo ago so Molik a piyakasinggay a katoanan o manga Amoriyo.

14 Piroropet iyan so babarakaten kon a manga ator na piyamata iyan so manga polaos a toos ko katoanan a Asirah na siyapengang iyan angkoto a manga darpa sa manga tolang a manosiya.

15 Apiya so aparang ko barahala sii ko bobongan roo sa Bitil a biyangon i Yarobowam a wata i Nibat a piyakandosa niyan on so manga Israil na bininasa i Yosiyas. Giba iyan so aparang ago tiyapotapong iyan so manga ator on, na tiyotong iyan ai ago so polaos a toos ko katoanan a Asirah.

16 Oriyan iyan na miyangilailay si Yosiyas ko mbalabala na miyailay niyan so manga kobor sii ko silid o bobongan. Piyakipangowa niyan on so manga tolang na piyanotong iyan ko aparang sa kaperisiki niyan on a aya kiyatoman o katero o Allah a piyayag o sogo o Tohan a miyakaalamat sangkai a miyanggolaola.

17 Mandiyadi na iniise o dato a "Antona angkangan a monominto a pekeilay aken?"

"Itotoos anan ko kobor o sogo o Tohan a miyakapoon sa Yodah a miyakaalamat sangkai a pinggolaola ngka ko aparang sa Bitil," a inisembag o manga taw ko siti.

18 "Di niyo petekora," a tig i Yosiyas. "O ba aden a pakaalina niyo ko manga tolang iyan." Na lipas iran angkoto a manga tolang iyan ago so manga tolang o nabi a miyakapoon sa Samariya.

19 So pen so langon a aparang ko manga barahala a miyabangon o manga dato sa Israil sii ko oman i siti sa Samariya a piyakakerangit iran on so Allah na pinggegeba ini i Yosiyas ago piresikan iyan a datar den o pinggolaola niyan sa Bitil.

20 Piyamono iyan so langon a manga imam ko manga barahala sii ko manga aparang a roo siran pepagimam, na piyanotongan iyan ai sa manga tolan a manosiya. Oriyan iyan na komiyasoy sekaniyan sa Yarosalim.

Piselasela i Yosiyas so Paska

21 Inisogo i Yosiyas ko langon o manga taw a "Selasela niyo so Paska a ipembantog ko Allah a Tohan iyo a mipenggolalan iyo so misosorat sangkai a Ribro a Kapasadan."

22 Da den a ba datar iyan a kiyaselasela ko Paska sii ko langon o manga gawii o manga dato sa Israil ago manga dato sa Yodah ipoon den ko masa a kandadato o manga pangongokom sa Israil.

23 Na miyaselasela angkai a Paska ko Allah sii sa Yarosalim ko ikasapolo ago walo ragon a kandadato i Yosiyas.

24 Liyo ron pen na piyakaawa i Yosiyas sa Yarosalim ago sa dalem a inged a Yodah so manga pendarpaan ago so manga pepamangangay na piyakada iyan on pen so manga katohanan sa walay, so manga barahala ago so langon a ped a piyakasingay a manga nganin. Pinggolaola niyan ai a aya niyan kininggolalanan ko manga sogoan a misosorat ko Ribro a miyatoon i Hilkiyas a imam sii ko Timplo o Allah.

25 Da den a miyaonaan iyan o di na miyaoriyan iyan a dato a ba niyan lagid a miyananangoran ko Allah sa iklas ko poso iyan, iklas ko niyawa niyan ago iklas ko bager iyan a petoman ko langon o Kitab o Mosa.

26 Apiya pen oto na da den malenggaw so mala a rarangit o Allah a pesokeyaw sa Yodah sabap ko langon a pinggolaola i Manasih a inikarangit o Allah.

27 Na pitero iyan a "Penggolaolaan ko sa Yodah so inikidia ko sa Israil. Imbowang aken so manga taw ron a poon ko kamamasaan aken na telikodan aken pen angkai a siti a Yarosalim a pinili aken ago so Timplo a miyatero aken a 'Roo aken tegoa so Ingaran aken.' "

So Kaposan o Kandadato i Yosiyas

28 So ped a miyanga sosowasowa ko kandadato i Yosiyas ago so langon a pinggolaola niyan na palaya den misosorat ko 'Ribro a Totolan ko manga Dato sa Yodah.'

29 Sii ko kandadato pen i Yosiyas na si Piraon Niko a dato sa Misir na somiyong ko lawasaig a Yopratis ka pagogopan iyan so dato sa Asiriya. Na lominiyo si Yosiyas a makipetidawa on. Siyampang sekaniyan i Niko sii sa Migido na miyapatay niyan.

30 So manga oripen i Yosiyas na riyoran iran so lawas iyan ko karo na inikasoy iran sa Yarosalim a poon sa Migido na inilebeng iran ko kobor iyan. Na so manga taw ko inged na kinowa iran si Yahowahas a wata i Yosiyas na siyalawatan iran a madato a misambi ki ama iyan.

Si Yahowahas a Dato sa Yodah

31 Si Yahowahas na miyakadowa polo ago telo ragon a idad iyan isako mabaloy a dato na miyakandato sa miyakatelo olan sii sa Yarosalim. Aya ngaran o ina iyan na si Hamotal a wata i Yaramiyas a taga Libnah.

32 Miyakanggolaola sekaniyan sa marata ko kapekeilaya on o Allah a lagid o manga apo iyan.

33 Piyakikalaboso sekaniyan i Piraon Niko sii sa Riblah sa inged a Hamat kaan di den makapendato sii sa Yarosalim. Piyamantonan pen o Piraon a Yodah a mbayad rekaniyan sa bowis a telo nggibo ago lima gatos ka kilo a pirak ago telo polo ago lima ka kilo a bolawan.

34 Biyaloy i Piraon Niko so wata i Yosiyas a si Iliyakim a dato a inisambi ki Yosiyas a ama iyan na piyagalinan iyan sa ngaran a Yahoyakim ogaid na inowit iyan si Yahowahas sa Misir a ron den miyatay.

35 Inibayad i Yahoyakim ko Piraon Niko so inipanton on a pirak ago bolawan ogaid na an iyan ai mitoman na piyakabowis iyan so manga taw ko inged sa itongan ko pirak ago bolawan a makaaayon ko kadakel o manga tamok iran.

Si Yahoyakim a Dato sa Yodah

36 Si Yahoyakim na miyakadowa polo ago lima ragon a idad iyan isako mabaloy a dato na miyakandato sa miyakasapolo ago isa ragon sii sa Yarosalim. Aya ngaran o ina iyan na si Sibidah a wata i Pidayas a taga Ramah.

37 Na miyakanggolaola sekaniyan sa marata ko kapekeilaya on o Allah a lagid o manga apo iyan.

2 MANGA DATO 24

Sii ko kandadato i Yahoyakim na si Nibokadnisar a dato sa Babilon na gomiyobat sa inged a Yodah na mibaloy si Yahoyakim a sakop iyan ko miyakatelo ragon, ogaid na miyaalin so pamikiran i Yahoyakim na siyopak iyan si Nibokadnisar.

2 Somiyogo so Allah sa manga sagorompong a pagogobat sa Yodah, a so manga taw sa Babilon, manga Isiriyanen, manga Mowabiyo ago manga Amoniyo sa kambinasaa iran ko inged a giyoto so pitero o Allah a penggolaolaan iyan a nggolalan ko manga oripen iyan a manga nabi.

3 Mataan a miyanggolaola ini sa Yodah sabap ko inisogo o Allah kaan iyan mapakaawa so manga taw sa Yodah a poon ko kamamasaan iyan sabap ko langon a miyandosa i Manasih.

4 Ka madakel a miyapamono iyan a da a manga sala iyan a minipeno so rogo iran sa Yarosalim, na di den keterangan so Allah o ba niyan ai rilaan.

5 So ped a miyanga sosowasowa ko kandadato i Yahoyakim ago so langon a miyanggolaola niyan na palaya den misosorat ko 'Ribro a Totolan ko manga Dato sa Yodah.'

6 Miyatay si Yahoyakim na so wata iyan a si Yahoyakin na aya on miyakasambi a dato.

7 So dato sa Misir ago so manga sondaro niyan na da den liyo peroman ko inged iran ka

kagiya so dato sa Babilon na miyaagaw niyan langon so masasakop o dato sa Misir ipoon ko temanaan a Misir taman ko Lawasaig a Yopratis.

Si Yahoyakin a Dato sa Yodah

8 Miyakasapolo ago walo ragon a idad i Yahoyakin isako poon ndato na miyakandato sa telo olan sa Yarosalim. Aya ngaran o ina iyan na si Nikosta a wata i Inatan a taga Yarosalim.

9 Miyakanggolaola sekaniyan sa marata ko kapekeilaya on o Allah a lagid o ama iyan.

10 Sii ko kandadato iyan na so manga sondaro i Nibokadnisar a dato sa Babilon na somiyong sa Yarosalim na linikopan iran,

11 Na si den si Nibokanisar i miyakaoma roo sii ko kalilikopi ran on.

12 Na so dato Yahoyakin a rakes o ina iyan, so manga mosawira iyan, so manga olowan iyan ago so manga sanasanaan iyan na palaya siran den miyoral ko dato sa Babilon.

Sii ko ikawalo ragon a kandadato i Nibokadnisar a dato sa Babilon na biniyag iyan si Yahoyakin.

13 Kinowa niyan langon so manga tamok ko Timplo o Allah ago sii ko torogan o dato, na piyamotol iyan so langon a manga nganin san a bolawan a pimbaalan o Solaiman a dato sa Israil a pegosaren ko Timplo a giyoto den so miyatero o Allah.

14 Miyamiyag si Nibokadnisar sa sapolo nggibo a manga taw sa Yarosalim na initaog iyan siran, a so langon a manga olowan ago lebi a manga pipiya a sondaro, ago so langon a manga panday ago manga panenesel.

15 Inowit i Nibokadnisar si Yahoyakin a biyag roo sa Babilon, na so pen so ina o dato, so manga karoma niyan, so manga olowan iyan ago so manga tenger a taw sa Yarosalim na initaog iyan sa Babilon.

16 Initaog iyan roo pen so langon o pito nggibo a manga wawaraw ago manga babager a sondaro a tadiyam sa katidawa, ago sanggibo a manga panday ago manga panenesel.

17 Na initoro iyan si Mataniyas a bapa i Yahoyakin a dato a aya on inisambi, na piyagalinan iyan sa ngaran a Sidikiyas.

Si Sidikiyas a Dato sa Yodah

18 Dowa polo ago isa ragon a idad i Sidikiyas isako mabaloy a dato na miyakandato sa miyakasapolo ago isa ragon sii sa Yarosalim. Aya ngaran o ina iyan na si Hamotal a wata i Yaramiyas a taga Libnah.

19 Miyakanggolaola sekaniyan sa marata ko kapekeilaya on o Allah a datar o pinggolaola i Yahoyakin.

20 Langon ai miyanggolaola sa Yarosalim ago giya Yodah sabap ko rarangit kiran o Allah na aya kiyaorayan on na inibowang iyan siran a poon ko kamamasaan iyan.

So Kiyatabana sa Yarosalim

Na siyopak i Sidikiyas so dato sa Babilon.

2 MANGA DATO 25

Sabap roo sii ko ikasiyaw ragon ko kandadato i Sidikiyas sii ko ikasapolo gawii ko ikasapolo olan na somiyong si Nibokadnisar sa Yarosalim a rakes o langon o manga sondaro niyan. Pikempowan iran so liyo o siti na miyangon siran sa manga tambak ko mbabalibeta on

2 Na lomilikop siran ko siti taman ko ikasapolo ago isa ragon a kandadato i Sidikiyas.

3 Sii ko ikasiyaw gawii ko ikapat olan a miyakaregen so taon ko siti a da den a kekan o manga taw

4 Na miyabinasa so ped ko pangeleban o siti. Na sangkoto a kagagawii a apiya lomilikop pen so manga taw sa Babilon ko siti na miyamalagoy so dato ago so langon a manga sondaro a sii siran miyokit ko pintoan ko pegeletan o dow a pangeleban a marani ko sapadan o dato, na miyamagapas siran sa Balintad a Yordan.

5 Ogaid na siyaloba o manga sondaro a Babilon so dato Sidikiyas na riyat iran ago diyakep iran sii ko kapantaran sa Yariko, ka so langon a sondaro niyan na miyakabelag rekaniyan den a miyamngiparak.

6 Inowit iran sekaniyan ko dato sa Babilon sii sa Riblah a ron miyakokom.

7 Biyono iran so manga wata i Sidikiyas ko kapegilaya niyan on, na iniresok iran so manga mata i Sidikiyas, na piyatong iran a tombaga na inowit iran sa Babilon.

So Kiyabinasaa ko Timplo

8 Sii ko ikapito gawii ko ikalima olan sii ko ikasapolo ago siyaw ragon a kandadato i Nibokadnisar sa Babilon na si Nibosaradan a komandir o manga gordiya ago sanasanaan o dato sa Babilon na somiyong sa Yarosalim.

9 Piyanotong iyan so Timplo o Allah ago so torogan o dato ago so manga walay o langon a manga ala a taw roo sa Yarosalim.

10 Na so langon a manga sondaro a Babilon a ped o komandir na initobak iran so pangeleban a mililibet sa Yarosalim.

11 Initaog i Nibosaradan so langon a taw a miyalamba ko siti a rakes on so siran oto a miyonot ko dato sa Babilon.

12 Ogaid na inibegak o komandir so ped ko lebi a manga miskin sii ko inged a makapenggalebek ko manga asinda a obas ago so manga dii mbabasokan.

13 Piroropet o manga taw sa Babilon so manga polaos a tombaga ago so mapepegalinalin a manga batoga ago so maolad a tangela a tombaga a pepengonaban a matatago ko Timplo o Allah na inawidan iran so tombaga sa Babilon.

14 Inawidan iran roo pen so manga koden, manga sakerad, manga ipetenor ko sombowan, manga kaloda, manga lapad ago so langon taman a manga tombaga a nganin san a pegosaren ko dii kapanalagadi ko Timplo.

15 Inawidan pen o komandir so langon taman a inembaalan a lombos a bolawan ago pirak a rakes on so manga tangela sa waga a apoy ago so manga ladiya.

16 So tombaga ko dow a polaos ago so maolad a tangela ago so manga batoga a inembaalan o Solaiman a pegosaren ko Timplo o Allah na di ketakes so kapened iyan.

17 So oman i polaos na walo ka mitros a kaporo iyan. Sii sa poro iyan na aden a ipopondiyong on a tombaga a manga dow a ago tenga ka mitros a kaporo iyan.

Piyagartaan ai sa inisayan sa siyobid a tombaga ago so inisayan sa manga granada a tombaga ko melilibeta on. So dow a polaos na ndatar.

Initaog so manga Taw sa Yodah

18 Minioman sii na biniyag o komandir Nibosaradan si Sirayas a so maporo a imam, si Sipaniyas a so katib ago so telo kataw a komikibir ko pintoan.

19 Na poon ko siran oto a sisii pen ko siti na kinowa niyan so isa a olowan o manga sondaro, so lima kataw a manga mosawira o dato, so panonorat a aya komikibir ko manga listaan ko manga sondaro ago so nem polo a ped a manga taw a miyatoon ko siti.

20 Na inowit siran langon o komandir Nibosaradan ko dato sa Babilon sii sa Riblah

21 Sa inged a Hamat. Na roo siran piyakipamono o dato sa Babilon.

Na miyamangitaog so manga taw sa Yodah a miyanga bebelag ko inged iran.

Si Gidaliyas a Gobirnadur sa Yodah

22 Si Nibokadnizar a dato sa Babilon na initoro iyan si Gidaliyas a wata i Ahikam, a so wata i Sapon, a aya gobirnadur ko manga taw a minibegak sa Yodah.

23 Kagiya maneg o langon o manga olowan a sondaro sa Yodah ago so manga pagtaw iran a initoro o dato sa Babilon si Gidaliyas a aya gobirnadur na somiyong siran ki Gidaliyas sii sa Mispah. Siran na si Ismail a wata i Nitaniyas, si Yohanan a wata i Kariyas, si Sirayas a wata i Tanhomit a taga Nitopata ago si Yaasaniyas a poon sa Maakah a rakes o manga taw iran.

24 Na misepa kiran si Gidaliyas a tig iyan a "Di niyo pekeleken so manga olowan sa Babilon. Kakaden kano baden ko inged na pangongonotani niyo so dato sa Babilon ka da a ba marata a kesowasowa iyo."

25 Ogaid na sii ko ikapito olan sangkoto a ragon na si Ismail a wata i Nitaniyas ago apo i Iisama a ped ko kiyababadan ko dato na somiyong sa Mispah a oonotan o sapolo kataw na biyono iyan si Gidaliyas ago so mambo so manga Yahodi ago so manga taw sa Babilon a ped iyan roo sa Mispah.

26 Sabap sii na so langon a taw sa Yodah ipoon sa mababa taman sa maporo a rakes on so manga olowan a sondaro na miyamagapas siran sa Misir sabap ko kalek iran ko manga taw sa Babilon.

Piyakaliyo si Yahohakin ko Kalaboso

27 Sii ko ikatelo polo ago pito ragon a kinitaog i Yahoyakin a dato sa Yodah sii ko ragon a kiyabaloy i Ibilmirodak a dato sa Babilon na piyakaliyo niyan si Yahoyakin sa kalaboso sii ko ikadowa polo ago pito gawii ko ikasapolo ago dowan olan.

28 Diyolon iyan sekaniyan a limo na bigan iyan sa maporo a pangkatan a di so ped a manga dato a ped iyan sa Babilon.

29 Inendaan i Yahoyakin so nditaren iyan a kalaboso na sii ko lamba o omor iyan na pepekakan sekaniyan sii ko lamisaan o dato.

30 Na gawii gawii den na pembegan o dato si Yahoyakin sa gasto niyan taman ko kaoyogoyag iyan pen.